


Broj: 03-02-382/2022  
Sarajevo, 25.03.2022. godine

**PARLAMENT FEDERACIJE  
BOSNE I HERCEGOVINE**



- **Predstavnički dom** -  
gosp. **Mirsad Zaimović**, predsjedavajući

- **Dom naroda** -  
gosp. **Tomislav Martinović**, predsjedavajući

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbama čl. 163, 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08 i 26/20) i čl. 155, 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i prihvatanja, dostavljam Vam NACRT ZAKONA O IZMJENAMA I DOPUNAMA KRIVIČNOG ZAKONA FEDERACIJE BOSNE I HERCEGOVINE**, koji je utvrdila Vlada Federacije Bosne i Hercegovine na 309. sjednici, održanoj 24.03.2022. godine.

Nacrt zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



**PREMIJER**  
**Fadi Novalić**

Prilog: - Nacrt zakona na bosanskom jeziku,  
- Odredbe Zakona koje se mijenjaju i dopunjuju,  
- Izjava o usklađenosti,  
- Obrazac broj 2 i  
- Krivični zakon Federacije Bosne i Hercegovine  
(„Službene novine Federacije BiH“, br. 36/03, 21/04 - ispr., 69/04,  
18/05, 42/10, 42/11, 59/14, 76/14, 46/16 i 75/17) (CD).

**Cc: Federalno ministarstvo pravde**  
gosp. **Mato Jozić**, ministar

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**NACRT**

**ZAKON  
O IZMJENAMA I DOPUNAMA KRIVIČNOG ZAKONA FEDERACIJE BOSNE I  
HERCEGOVINE**

**Sarajevo, mart 2022. godine**

# ZAKON O IZMJENAMA I DOPUNAMA KRIVIČNOG ZAKONA FEDERACIJE BOSNE I HERCEGOVINE

## Član 1.

U Krivičnom zakonu Federacije Bosne i Hercegovine („Službene novine Federacije BiH“, br. 36/03, 21/04 - ispr., 69/04, 18/05, 42/10, 42/11, 59/14, 76/14, 46/16 i 75/17), u članu 2. stav (12) mijenja se i glasi:

„(12) Dijete je osoba koja nije navršila 18 godina života.“

Stav (13) mijenja se i glasi:

„(13) Mlađa punoljetna osoba je osoba koja je u vrijeme učinjenja krivičnog djela navršila 18 a nije navršila 21 godinu života.“

Iza stava (13) dodaju se novi st. (14), (15) i (16) koji glase:

„(14) Članovi porodice su bračni ili izvanbračni partner, njihova zajednička djeca, te djeca svakog od njih, srodnik po krvi u pravoj liniji, srodnik u pobočnoj liniji zaključno do trećeg stepena, srodnici po tazbini zaključno do drugog stepena, usvojitelj ili usvojenik.

(15) Bliske osobe su članovi porodice, bivši bračni ili izvanbračni partner, životni partner, bivši životni partner, sadašnji ili bivši partner u intimnoj vezi i osobe koje imaju zajedničko dijete.

(16) Životni partner je osoba koja s drugom osobom živi u zajednici koja ima trajniji karakter.“

Dosadašnji st. (14) do (37) postaju st. (17) do (39).

## Član 2.

U članu 9. naziv člana mijenja se i glasi:

„(Isključenje primjene krivičnog zakonodavstva u Federaciji prema djeci koja nisu navršila 14 godina života)“.

## Član 3.

Član 10. mijenja se i glasi:

„Član 10.

(Primjena krivičnog zakonodavstva u Federaciji prema djeci starijoj od 14 godina i mlađim punoljetnim osobama)

Prema osobi koja je u vrijeme učinjenja krivičnog djela navršila 14 godina, a nije navršila 21 godinu života primjenjuje se ovaj zakon ako posebnim zakonom nije drugačije propisano.“

## Član 4.

U članu 14. stav (2) mijenja se i glasi:

„(2) Odredbe općeg dijela ovog zakona primjenjuju se prema djeci starijoj od 14 godina i mlađim punoljetnim osobama, osim ako posebnim zakonom nije drugačije propisano.“



## **Član 5.**

U članu 16. iza stava (6) dodaje se novi stav (7) koji glasi:

„(7) Za krivična djela trgovine ljudima i organizirane trgovine ljudima, krivična djela protiv spolne slobode i morala, krivična djela spolnog zlostavljanja i iskorištavanja djeteta i krivična djela protiv braka, porodice i mladeži učinjena na štetu djeteta, zastarjelost krivičnog gonjenja počinje teći od punoljetstva žrtve.“

## **Član 6.**

U članu 41. iza stava (1) dodaje se novi stav (2) koji glasi:

„(2) Učinitelju krivičnog djela iz koristoljublja novčana kazna se može izreći kao sporedna kazna i kad nije propisana zakonom ili kad je propisano da će se učinitelj kazniti kaznom zatvora ili novčanom kaznom, a sud kao glavnu izrekne kaznu zatvora.“

## **Član 7.**

U članu 43. stav (3) mijenja se i glasi:

„(3) Kazna zatvora iz st. (1) i (2) ovog člana ne može se izreći djeci starijoj od 14 godina. Djeci starijoj od 16 godina može se izreći kazna maloljetničkog zatvora pod uvjetima propisanim posebnim zakonom.“

## **Član 8.**

U članu 51. stav (1) točka e) riječi: „od najviše“ zamjenjuju se riječju „do“.

## **Član 9.**

U članu 54. stav (5) iza riječi: „jedinственu kaznu“ dodaje se riječ: „zatvora“.

## **Član 10.**

Naziv Glave „X - GLAVA DESETA PRAVILA O ODGOJNIM PREPORUKAMA, O ODGOJNIM MJERAMA I O KAŽNJAVANJU MALOLJETNIKA“ i čl. 79. do 109. brišu se.

## **Član 11.**

U članu 110. stav (1) riječi: „i kazna maloljetničkog zatvora izvršavaju“ zamjenjuju se riječju: „izvršava“.

## **Član 12.**

Član 112. stav (1) mijenja se i glasi:

„(1) Osoba osuđena na kaznu zatvora ili kaznu dugotrajnog zatvora, koja je sposobna za rad, može raditi ukoliko ona na to pristane.“

## **Član 13.**

U članu 113. stav (1) mijenja se i glasi:

„(1) Prema osobi koja je navršila 16 godina, dok ne navrši 18 godina života, kazna maloljetničkog zatvora izvršava se u posebnim kazneno-popravnim ustanovama za maloljetnike. Prema osobi koja je navršila 18 godina života, ali nije navršila 23 godine života kazna maloljetničkog zatvora se izvršava u posebnim ustanovama za mlađe punoljetne osobe ili u posebnom odjeljenju ustanove u kojoj se kazna izvršava prema punoljetnim osobama, pri čemu se osigurava da mlađe punoljetne osobe ne dođu u kontakt sa starijim zatvorenicima. Prema osobi koja je navršila 23 godine života prije kraja izdržavanja kazne ostatak kazne se izvršava u kazneno-popravnoj ustanovi za odrasle.“

#### **Član 14.**

U članu 121. stav (1) mijenja se i glasi:

„(1) Poslije izdržane, oproštene ili zastarjele kazne zatvora ili kazne dugotrajnog zatvora, osuđene osobe uživaju sva prava utvrđena ustavom, zakonom i drugim propisima i mogu sticati sva prava, osim onih koja su im ograničena sigurnosnom mjerom ili nastupanjem pravne posljedice osude.“

#### **Član 15.**

U članu 125. stav (4) mijenja se i glasi:

„(4) Osuda na kaznu dugotrajnog zatvora i osuda zbog krivičnih djela spolnog zlostavljanja i iskorištavanje djeteta se ne briše.“

#### **Član 16.**

U članu 166. stav (2) u tački e) tačka se zamjenjuje tačka-zarezom i dodaju nove tač. f) i g) koje glase:

- „f) ko usmrti člana porodice ili blisku osobu koju je prethodno zlostavljao;
- g) ko usmrti dijete ili trudnu ženu.“

#### **Član 17.**

Član 170. mijenja se i glasi:

##### **„Član 170.**

(Učestvovanje u samoubistvu)

(1) Ko navede drugog na samoubistvo ili mu pomogne u samoubistvu, pa ono bude učinjeno ili pokušano, kaznit će se kaznom zatvora od šest mjeseci do pet godina.

(2) Ko djelo iz stava (1) ovog člana učini prema djetetu koje je navršilo 14 godina ili prema osobi čija je sposobnost shvaćanja značenja svog djela ili upravljanja svojim postupcima bitno smanjena, kaznit će se kaznom zatvora od jedne do deset godina.

(3) Ko djelo iz stava (1) ovog člana učini prema djetetu koje nije navršilo 14 godina ili prema osobi koja nije mogla shvatiti značaj svog djela ili upravljati svojim postupcima, kaznit će se po članu 166. (Ubistvo) stav (1) ovog zakona.

(4) Ko okrutno ili nečovječno postupa s osobom koja se prema njemu nalazi u odnosu kakve podređenosti ili zavisnosti i time iz nehata izazove samoubistvo ili

pokušaj samoubistva te osobe, kaznit će se kaznom zatvora od šest mjeseci do pet godina.“

### Član 18.

U članu 171. stav (1) mijenja se i glasi:

„(1) Ko protivno propisima o prekidu trudnoće trudnoj ženi s njezinim pristankom započne činiti ili učini prekid trudnoće ili je potakne ili joj pomogne učiniti prekid trudnoće, kaznit će se kaznom zatvora od tri mjeseca do tri godine.“

St. (3) i (4) mijenjaju se i glase:

„(3) Ako je krivičnim djelom iz stava (1) ovog člana trudnoj ženi zdravlje teško narušeno ili je prouzrokovana smrt trudne žene ili je djelo učinjeno prema djetetu, učinitelj će se kazniti kaznom zatvora od jedne do deset godina.

(4) Ako je krivičnim djelom iz stava (2) ovog člana trudnoj ženi zdravlje teško narušeno ili je prouzrokovana smrt trudne žene ili je djelo učinjeno prema djetetu, učinitelj će se kazniti kaznom zatvora od tri do 15 godina.“

### Član 19.

Član 172. mijenja se i glasi:

#### „Član 172.

(Teška tjelesna ozljeda)

(1) Ko drugoga teško tjelesno ozlijedi ili mu zdravlje teško naruši, kaznit će se kaznom zatvora od šest mjeseci do pet godina.

(2) Ko drugoga tjelesno ozlijedi ili mu zdravlje naruši tako teško da je zbog toga doveden u opasnost život ozlijeđenog ili je uništen ili trajno i u znatnoj mjeri oslabljen koji važan dio njegova tijela ili koji važan organ ili je prouzrokovana trajna nesposobnost za rad ozlijeđenog ili trajno i teško narušenje njegovog zdravlja ili unakaženost, kaznit će se kaznom zatvora od jedne do osam godina.

(3) Ako ozlijeđeni umre zbog ozljede iz st. (1) i (2) ovog člana, učinitelj će se kazniti kaznom zatvora od dvije do 12 godina.

(4) Ako je krivično djelo iz st. (1) do (3) ovog člana učinjeno prema djetetu ili trudnoj ženi ili članu porodice ili bliskoj osobi koju je učinitelj prethodno zlostavljao ili prema osobi posebno ranjivoj zbog teže tjelesne ili duševne smetnje ili iz mržnje, kaznit će se za krivično djelo iz stava (1) ovog člana kaznom zatvora od jedne do osam godina, za krivično djelo iz stava (2) ovog člana kaznom zatvora od dvije do deset godina, a za krivično djelo iz stava (3) ovog člana kaznom zatvora od tri do 15 godina.

(5) Ko krivično djelo iz st. (1) i (2) ovog člana učini iz nehata, kaznit će se kaznom zatvora do tri godine.

(6) Ko krivično djelo iz st. (1) do (3) ovog člana učini na mah, doveden bez svoje krivnje u jaku razdraženost ili prepast napadom, zlostavljanjem ili teškim vrijeđanjem od ozlijeđenog, kaznit će se za krivično djelo iz st. (1) i (2) kaznom zatvora od tri mjeseca do tri godine, a za krivično djelo iz stava (3) kaznom zatvora od šest mjeseci do pet godina.“

## Član 20.

U članu 173. stav (2) mijenja se i glasi:

„(2) Ko krivično djelo iz stava (1) ovog člana učini prema članu porodice ili bliskoj osobi ili prema djetetu ili trudnoj ženi ili osobi posebno ranjivoj zbog njezine teže tjelesne ili duševne smetnje ili iz mržnje, kaznit će se kaznom zatvora do tri godine.“

Stav (3) briše se.

## Član 21.

Iza člana 173. dodaju se novi čl. 173a. i 173b. koji glase:

### „Član 173a.

(Sakaćenje ženskih spolnih organa)

(1) Ko ženskoj osobi potpuno ili djelomično odstrani, obreže ili na drugi način izvrši sakaćenje vanjskih spolnih organa ili je na to navede ili joj pomogne u tome, kaznit će se kaznom zatvora od jedne do osam godina.

(2) Ako je djelo iz stava (1) ovog člana učinjeno iz mržnje ili prema djetetu ili prema članu porodice ili bliskoj osobi, učinitelj će se kazniti kaznom zatvora od jedne do deset godina.

(3) Ako je uslijed krivičnog djela iz st. (1) i (2) ovog člana nastupila smrt ženske osobe, učinitelj će se za krivično djelo iz stava (1) ovog člana kazniti kaznom zatvora od tri do 12 godina, a za krivično djelo iz stava (2) kaznom zatvora od tri do 15 godina.

### Član 173b.

(Prinudna sterilizacija)

(1) Ko na drugoj osobi izvrši operaciju u svrhu onemogućavanja prirodne reprodukcije bez pristanaka te osobe, kaznit će se kaznom zatvora od jedne do osam godina.

(2) Ako je djelo iz stava (1) ovog člana izvršeno iz mržnje ili prema djetetu ili članu porodice ili bliskoj osobi, učinitelj će se kazniti kaznom zatvora od jedne do deset godina.

(3) Ako je uslijed djela iz stava (1) ovog člana nastupila smrt osobe, učinitelj će se kazniti kaznom zatvora od tri do 15 godina.“

## Član 22.

Iza člana 179. dodaje se novi član 179a. koji glasi:

### „Član 179a.

(Uhođenje)

(1) Ko ponovljeno prati ili uhodi drugu osobu ili s njom direktno ili preko treće osobe nastoji uspostaviti ili uspostavlja neželjeni kontakt ili je na drugi način zastrašuje i time kod nje izazove tjeskobu ili strah za njezinu sigurnost ili sigurnost njenog člana porodice ili njoj bliske osobe, kaznit će se kaznom zatvora do jedne godine.



(2) Ako je djelo iz stava (1) ovog člana učinjeno u odnosu na člana porodice ili blisku osobu ili prema djetetu, učinitelj će se kazniti kaznom zatvora do tri godine.“

#### **Član 23.**

U članu 180. stav (2) riječi: „ili maloljetniku“ brišu se.

#### **Član 24.**

Iza člana 181. dodaje se novi član 181a. koji glasi:

##### **„Član 181a. (Psihičko nasilje)**

(1) Ko zlostavlja drugog ili prema njemu postupa na način kojim se vrijeđa ljudsko dostojanstvo i time naruši njegov psihički integritet, kaznit će se kaznom zatvora do jedne godine.

(2) Ako je djelo iz stava (1) ovog člana učinjeno prema djetetu, učinitelj će se kazniti kaznom zatvora od šest mjeseci do pet godina.“

#### **Član 25.**

U članu 183. stav (3) briše se.

#### **Član 26.**

U članu 189. stav (3) mijenja se i glasi:

„(3) Predmeti koji su bili namijenjeni ili upotrijebljeni za učinjenje krivičnog djela iz st. (1) i (2) ovog člana i predmeti koji su nastali učinjenjem tih krivičnih djela oduzet će se.“

Stav (4) briše se.

#### **Član 27.**

Iza člana 189. dodaje se novi član 189a. koji glasi:

##### **„Član 189a. (Zloupotreba snimke spolno eksplicitnog sadržaja)**

(1) Ko zloupotrijebi odnos povjerenja i bez pristanka snimane osobe učini dostupnim trećoj osobi snimku spolno eksplicitnog sadržaja koja je snimljena uz pristanak te osobe za osobnu upotrebu i na taj način povrijedi privatnost te osobe, kaznit će se kaznom zatvora do tri godine.

(2) Kaznom iz stava (1) ovog člana kaznit će se ko upotrebom računalnog sistema ili na drugi način izradi novu ili preinači postojeću snimku spolno eksplicitnog sadržaja i tu snimku upotrijebi kao pravu te time povrijedi privatnost osobe na toj snimci.

(3) Ko krivično djelo iz st. (1) i (2) ovog člana učini putem računalnog sistema ili mreže ili na drugi način zbog čega je snimka postala dostupna većem broju osoba, kaznit će se kaznom zatvora do tri godine.

(4) Snimke i posebne naprave kojima je učinjeno krivično djelo iz ovog člana će se oduzeti.“

## Član 28.

Član 203. mijenja se i glasi:

### „Član 203. (Silovanje)

(1) Ko s drugom osobom bez njezina pristanka izvrši spolni odnošaj ili s njim izjednačenu spolnu radnju ili navede drugu osobu da bez svog pristanka s trećom osobom izvrši spolni odnošaj ili s njim izjednačenu spolnu radnju ili da bez svog pristanka nad samom sobom izvrši sa spolnim odnošajem izjednačenu spolnu radnju, kaznit će se kaznom zatvora od jedne do pet godina.

(2) Učinitelj koji je bio u otklonljivoj zabludi u pogledu postojanja pristanka iz stava (1) ovog člana, kaznit će se kaznom zatvora do tri godine.

(3) Ko drugu osobu upotrebom sile ili prijetnje da će izravno napasti na njezin život ili tijelo ili na život ili tijelo njoj bliske osobe prisili na spolni odnošaj ili s njim izjednačenu spolnu radnju, na spolni odnošaj ili s njim izjednačenu spolnu radnju s trećom osobom ili da nad samom sobom izvrši spolni odnošaj ili s njom izjednačenu spolnu radnju, kaznit će se kaznom zatvora od jedne do deset godina.

(4) Ko krivično djelo iz stava (1) ovog člana učini prema bliskoj osobi ili prema osobi posebno ranjivoj zbog bolesti, ovisnosti, trudnoće, invaliditeta, teške tjelesne ili duševne smetnje ili prema djetetu starijem od 15 godina ili na osobito okrutan ili osobito ponižavajući način ili iz mržnje ili zajedno s jednim ili više učinitelja pri čemu je prema istoj osobi izvršeno više spolnih odnošaja ili s njim izjednačenih spolnih radnji ili uz upotrebu oružja ili opasnog oruđa ili ako je silovana osoba teško tjelesno ozlijeđena ili je ostala trudna, kaznit će se kaznom zatvora od tri do deset godina.

(5) Ko krivično djelo iz stava (3) ovog člana učini pod okolnostima iz stava (4) ovog člana, kaznit će se kaznom zatvora od pet do 15 godina.

(6) Ako je krivičnim djelom iz st. (1) i (3) ovog člana prouzrokovana smrt osobe, učinitelj će se kazniti kaznom zatvora najmanje pet godina.

(7) Pristanak iz stava (1) ovog člana postoji ako je osoba svojom voljom odlučila stupiti u spolni odnošaj ili s njime izjednačenu spolnu radnju i bila je sposobna donijeti i izraziti takvu odluku. Smatra se da takvog pristanka nema osobito ako je spolni odnošaj ili s njime izjednačena spolna radnja izvršena uz upotrebu prijetnje, prevare, zloupotrebe položaja prema osobi koja se prema učinitelju nalazi u odnosu zavisnosti, iskorištavanja stanja osobe zbog kojeg ona nije bila sposobna izraziti svoje odbijanje ili nad osobom kojoj je protivpravno oduzeta sloboda.“

## **Član 29.**

Iza člana 203. dodaje se novi član 203a. koji glasi:

### **„Član 203a. (Spolno uznemiravanje)**

(1) Ko spolno uznemirava drugu osobu, kaznit će se kaznom zatvora do jedne godine.

(2) Ko djelo iz stava (1) učini prema osobi koja se prema njemu nalazi u odnosu podređenosti ili zavisnosti ili koja je posebno ranjiva zbog uzrasta, bolesti, invaliditeta, trudnoće, teže tjelesne ili duševne smetnje, kaznit će se kaznom zatvora od tri mjeseca do tri godine.

(3) Spolno uznemiravanje je svako verbalno, neverbalno ili fizičko neželjeno ponašanje spolne prirode koje ima za cilj ili stvarno predstavlja povredu dostojanstva osobe, koje uzrokuje strah, neprijateljsko, ponižavajuće ili uvredljivo okruženje.“

## **Član 30.**

Čl. 204, 205, 206. i 207. brišu se.

## **Član 31.**

Član 208. mijenja se i glasi:

### **„Član 208. (Bludne radnje)**

(1) Ko u slučajevima iz člana 203. (Silovanje) ovog zakona, kada nije učinjen ni pokušaj tog krivičnog djela, učini samo bludnu radnju, kaznit će se kaznom zatvora od tri mjeseca do tri godine.

(2) Ko djelo iz stava (1) učini prema djetetu starijem od 15 godina kaznit će se kaznom zatvora do tri godine.

(3) Ako djelo iz stava (2) učini srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojitelj, staratelj, nastavnik, vaspitač, ljekar, vjerski službenik ili druga osoba kojoj je dijete povjerenjeno radi učenja, vaspitanja, čuvanja, staranja ili njege, učinitelj će se kazniti kaznom zatvora od šest mjeseci do pet godina.

## **Član 32.**

Član 209. briše se.

## **Član 33.**

Iza člana 210b. dodaje se nova glava XIXa i novi čl. 210c, 210d, 210e, 210f, 210g, 210h, 210i. i 210j., koji glase:

„XIXa – GLAVA DEVETNAEST A - KRIVIČNA DJELA SPOLNOG ZLOSTAVLJANJA I ISKORIŠTAVANJA DJETETA

Član 210c.  
(Spolni odnošaj s djetetom mlađim od 15 godina)

(1) Ko izvrši spolni odnošaj ili s njim izjednačenu spolnu radnju s djetetom mlađim od 15 godina ili ga navede da izvrši spolni odnošaj ili s njim izjednačenu spolnu radnju s trećom osobom ili da nad samim sobom izvrši sa spolnim odnošajem izjednačenu spolnu radnju, kaznit će se kaznom zatvora od jedne do deset godina.

(2) Ako djelo iz stava (1) ovog člana učini srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojitelj, staratelj, nastavnik, vaspitač, ljekar, vjerski službenik ili druga osoba kojoj je dijete povjereno radi učenja, vaspitanja, čuvanja, staranja ili njege, učinitelj će se kazniti kaznom zatvora od tri do 12 godina.

(3) Ako je djelo iz stava (1) ovog člana učinjeno upotrebom sile ili prijetnje ili iskorištavanjem duševne poremećenosti ili nemoćnog stanja djeteta ili na naročito svirep ili ponižavajući način ili od strane više osoba ili je uslijed djela nastupila teška tjelesna povreda, teško narušavanje zdravlja ili trudnoća osobe prema kojoj je djelo učinjeno, učinitelj će se kazniti kaznom zatvora najmanje tri godine.

(4) Ako je djelo iz stava (2) ovog člana učinjeno upotrebom sile ili prijetnje ili iskorištavanjem duševne poremećenosti ili nemoćnog stanja djeteta ili na naročito svirep ili ponižavajući način ili od strane više osoba ili je uslijed djela nastupila teška tjelesna povreda, teško narušavanje zdravlja ili trudnoća osobe prema kojoj je djelo učinjeno, učinitelj će se kazniti kaznom zatvora najmanje pet godina.

(5) Ako je uslijed djela iz st. (1) do (4) ovog člana nastupila smrt djeteta, učinitelj će se kazniti kaznom zatvora najmanje deset godina.

(6) Ko nad djetetom mlađim od 15 godina izvrši bludnu radnju ili ga navede da izvrši bludnu radnju s drugom osobom ili da nad samim sobom izvrši bludu radnju, kaznit će se kaznom zatvora od šest mjeseci do pet godina.

(7) Ko pod uvjetima iz st. (2) do (4) ovog člana nad djetetom mlađim od 15 godina izvrši bludnu radnju, kaznit će se kaznom zatvora od jedne do osam godina.

(8) Učinitelj koji je bio u otklonjivoj zabludi u odnosu na životnu dob djeteta iz stava (1) ovog člana, kaznit će se kaznom zatvora od jedne do pet godina, a ako je bio u otklonjivoj zabludi u odnosu na životnu dob djeteta iz stava (6), kaznit će se kaznom zatvora od šest mjeseci do tri godine.

(9) Neće se kazniti učinitelj za djelo iz st. (1) i (6) ovog člana ako razlika u dobi između osoba koje vrše spolni odnošaj ili s njim izjednačenu spolnu radnju nije veća od tri godine.

Član 210d.  
(Spolna zloupotreba djeteta starijeg od 15 godina)

(1) Srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojitelj, staratelj, nastavnik, vaspitač, ljekar, vjerski službenik ili druga osoba koja izvrši obljubu ili s njom izjednačenu spolnu radnju s djetetom koje je navršilo 15 godina koje mu je povjereno na čuvanje, učenje, vaspitanje, staranje ili njegu ili ga navede da izvrši spolni odnošaj ili s njim izjednačenu spolnu radnju s trećom osobom ili da nad samim sobom izvrši sa spolnim odnošajem izjednačenu spolnu radnju, kaznit će se kaznom zatvora od jedne do deset godina.

(2) Kaznom iz stava (1) ovog člana kaznit će se i ko izvrši obljubu ili s njom izjednačenu spolnu radnju s djetetom starijim od 15 godina, iskoristivši njegovu psihičku nezrelost ili lakomislenost ili stanje nemoći ili ga navede da izvrši spolni

odnošaj ili s njim izjednačenu spolnu radnju s trećom osobom ili da nad samim sobom izvrši sa spolnim odnošajem izjednačenu spolnu radnju.

(3) Ko pod uslovima iz st. (1) i (2) izvrši bludnu radnju, kaznit će se kaznom zatvora od šest mjeseci do pet godina.

#### Član 210e.

(Mamljenje djece za zadovoljenje spolnih potreba)

(1) Punoljetna osoba koja osobi mlađoj od 15 godina, koristeći kompjutersku mrežu ili drugu informacijsku ili komunikacijsku tehnologiju, dogovori sastanak radi vršenja obljube ili s njom izjednačene spolne radnje ili radi proizvodnje pornografskog materijala ili radi drugih oblika spolnog iskorištavanja i koja poduzme radnje da do tog sastanka dođe, kaznit će se kaznom zatvora do tri godine.

(2) Ko prikuplja, daje ili prenosi podatke o osobi mlađoj od 15 godina radi učinjenja krivičnog djela iz stava (1) ovog člana, kaznit će se kaznom zatvora do jedne godine.

#### Član 210f.

(Zadovoljenje pohote pred djetetom)

(1) Ko pred djetetom mlađim od 15 godina čini radnje namijenjene zadovoljavanju vlastite ili tuđe pohote ili ko navede dijete mlađe od 15 godina da pred njim ili s drugom osobom čini takve radnje, kaznit će se kaznom zatvora od tri mjeseca do tri godine.

(2) Ko pod okolnostima iz člana 210d. st. (1) i (2) pred djetetom starijim od 15 godina čini radnje namijenjene zadovoljavanju vlastite ili tuđe pohote ili ko navede dijete starije od 15 godina da pred njim ili pred drugom osobom čini takve radnje, kaznit će se kaznom zatvora do tri godine.

#### Član 210g.

(Navođenje djeteta na prostituciju)

(1) Ko radi zarade ili druge koristi dijete navodi, podstiče ili namamljuje na pružanje seksualnih usluga ili na drugi način omogući njegovu predaju drugome radi pružanja seksualnih usluga ili na bilo koji način učestvuje u organiziranju ili vođenju pružanja seksualnih usluga, a znao je ili je morao i mogao znati da se radi o djetetu, kaznit će se kaznom zatvora od jedne do osam godina.

(2) Ko koristi seksualne usluge djeteta koje je navršilo 15 godina uz davanje bilo kakve naknade ili protuusluge, a znao je ili je bio dužan i mogao znati da se radi o djetetu, kaznit će se kaznom zatvora od šest mjeseci do pet godina.

(3) Ko djelo iz stava (1) ovog člana izvrši prema više osoba, kaznit će se kaznom zatvora od jedne do deset godina.

(4) Ko osobu za koju je znao ili morao i mogao znati da je dijete, radi zarade silom ili prijetnjom, obmanom, prevarom, zloupotrebom ovlasti ili teškog položaja ili odnosa zavisnosti, prisili ili navede na pružanje seksualnih usluga ili ko koristi seksualne usluge tog djeteta uz naplatu, a znao je ili je morao i mogao znati za navedene okolnosti, kaznit će se kaznom zatvora od tri do 15 godina.

(5) Ko oglašava pružanje seksualnih usluga djeteta, kaznit će se kaznom zatvora od šest mjeseci do pet godina.

(6) Nije od značaja za postojanje djela da li se osoba koja se navodi, podstiče ili namamljuje već ranije bavila prostitucijom.

#### Član 210h.

(Iskorištavanje djeteta radi pornografije)

(1) Ko navodi dijete na sudjelovanje u snimanju dječje pornografije ili ko organizira ili omogući snimanje dječje pornografije, kaznit će se kaznom zatvora od šest mjeseci do pet godina.

(2) Ko snimi, proizvede, nudi, čini dostupnim, distribuira, širi, uvozi, izvozi, pribavlja za sebe ili za drugoga, prodaje, daje, prikazuje ili posjeduje dječju pornografiju ili joj svjesno pristupa putem informacijsko - komunikacijskih tehnologija, kaznit će se kaznom zatvora od jedne do osam godina.

(3) Ko upotrebom sile, prijetnjom, obmanom, prevarom, zloupotrebom položaja ili teških prilika djeteta ili odnosa zavisnosti, prisili ili navede dijete na snimanje dječje pornografije, kaznit će se kaznom zatvora od jedne do deset godina.

(4) Predmeti, uređaji, sredstva, računalni programi i podaci namijenjeni ili upotrijebljeni za učinjenje krivičnog djela iz st. (1) do (3) ovog člana ili koji su nastali učinjenjem tih krivičnih djela će se oduzeti.

(5) Dijete se neće kazniti za proizvodnju i posjedovanje pornografskog materijala koji prikazuje njega osobno ili njega i drugo dijete ako su oni sami taj materijal proizveli i posjeduju ga uz pristanak svakog od njih i isključivo za njihovu osobnu upotrebu.

(6) Dječja pornografija u smislu ovog člana je materijal koji vizuelno ili na drugi način prikazuje dijete ili realno prikazano nepostojeće dijete ili osobu koja izgleda kao dijete u pravom ili simuliranom spolno eksplicitnom ponašanju ili koji prikazuje spolne organe djece u seksualne svrhe.

(7) Materijali koji imaju umjetnički, medicinski ili naučni značaj ne smatraju se pornografijom u smislu ovog člana.

#### Član 210i.

(Iskorištavanje djeteta za pornografske predstave)

(1) Ko navodi dijete na sudjelovanje u pornografskim predstavama, kaznit će se kaznom zatvora od šest mjeseci do pet godina.

(2) Ko upotrebom sile, prijetnjom, obmanom, prevarom, zloupotrebom položaja ili teških prilika djeteta ili odnosa zavisnosti, prisili ili navede dijete da sudjeluje u pornografskoj predstavi, kaznit će se kaznom zatvora od jedne do deset godina.

(3) Ko zarađuje od pornografskih predstava u kojima sudjeluje dijete ili na drugi način iskorištava dijete za pornografske predstave, kaznit će se kaznom zatvora od jedne do 12 godina.

(4) Kaznom zatvora iz stava (1) ovog člana kaznit će se ko posjećuje pornografsku predstavu ako je znao ili je morao i mogao znati da u njoj sudjeluje dijete.

(5) Predmeti, uređaji, sredstva, računalni programi i podaci namijenjeni ili upotrijebljeni za učinjenje krivičnog djela iz st. (1) do (4) ovog člana ili koji su nastali učinjenjem tih krivičnih djela će se oduzeti.

(6) Pornografska predstava u smislu ovog člana je prikazivanje uživo ili putem komunikacijskih sredstava pravog djeteta ili realno prikazanog nepostojećeg djeteta ili osobe koja izgleda kao dijete u pravom ili simuliranom spolno eksplicitnom ponašanju

ili spolnih organa pravog djeteta, realno prikazanog nepostojećeg djeteta ili osobe koja izgleda kao dijete u spolne svrhe.

**Član 210j.**  
(Upoznavanje djeteta s pornografijom)

(1) Ko djetetu mlađem od 15 godina proda, pokloni, prikaže ili javnim izlaganjem posredstvom računalnog sistema, mreže ili medija za pohranu računalnih podataka ili drugih vidova komunikacije ili na drugi način učini dostupnim spise, slike, audio-vizuelni materijal ili druge predmete pornografske sadržine ili mu prikaže pornografsku predstavu, kaznit će se kaznom zatvora od šest mjeseci do tri godine.

(2) Predmeti, uređaji, sredstva, računalni programi i podaci namijenjeni ili upotrebljeni za učinjenje krivičnog djela iz stava (1) ovog člana ili koji su nastali učinjenjem krivičnog djela će se oduzeti.

(3) Pornografijom u smislu ovog člana se smatra materijal koji vizuelno ili na drugi način prikazuje osobu u pravom ili simuliranom spolno eksplicitnom ponašanju ili koji prikazuje spolne organe ljudi u spolne svrhe.

(4) Materijali koji imaju umjetnički, medicinski ili naučni značaj ne smatraju se pornografijom u smislu ovoga člana.“

**Član 34.**

Čl. 211, 212. i 213. brišu se.

**Član 35.**

Iza člana 215. dodaje se novi član 215a. koji glasi:

**„Član 215a.**  
(Prinudno sklapanje braka)

(1) Ko upotrebom sile ili prijetnjom prisili drugu osobu da zaključi brak, kaznit će se kaznom zatvora od šest mjeseci do pet godina.

(2) Ko radi učinjenja djela iz stava (1) ovog člana drugu osobu odvede u inostranstvo ili je u istom cilju navede da ode u inostranstvo, kaznit će se kaznom zatvora do tri godine.

(3) Ako je djelo iz st. (1) i (2) ovog člana učinjeno prema djetetu, učinitelj će se kazniti kaznom zatvora od jedne do osam godina.“

**Član 36.**

Član 216. mijenja se i glasi:

**„Član 216.**  
(Izvanbračna zajednica s djetetom koje nije navršilo 16 godina)

(1) Punoljetna osoba koja izvanbračno živi s djetetom koje nije navršilo 16 godina života, a time ne čini neko drugo krivično djelo za koje je propisana teža kazna, kaznit će se kaznom zatvora do tri godine.

(2) Kaznom iz stava (1) ovog člana kaznit će se ko djetetu koje nije navršilo 16 godina života omogući izvanbračni život s drugom osobom ili ga na to navede, a time ne čini neko drugo krivično djelo za koje je propisana teža kazna.

(3) Ko krivično djelo iz stava (2) ovog člana učini iz koristoljublja, kaznit će se kaznom zatvora od šest mjeseci do pet godina.“

### **Član 37.**

Član 217. mijenja se i glasi:

#### **„Član 217. (Oduzimanje djeteta)**

(1) Ko dijete protupravno oduzme roditelju, usvojitelju, staratelju ili ustanovi kojoj je povjereno ili ko ga protupravno zadržava ili sprječava da bude s osobom koja ima to pravo ili ko onemogućuje izvršenje izvršne odluke o staranju prema djetetu, kaznit će se kaznom zatvora do tri godine.

(2) Ako je krivičnim djelom iz stava (1) ovog člana dijete napustilo teritoriju Federacije ili teritoriju Bosne i Hercegovine, učinitelj će se kazniti kaznom zatvora od tri mjeseca do pet godina.

(3) Učinitelj koji dobrovoljno preda dijete, može se osloboditi kazne.“

### **Član 38.**

U članu 218. riječi: „tri mjeseca do tri godine“ zamjenjuju se riječima: „šest mjeseci do pet godina“.

### **Član 39.**

U članu 219. st. (1) i (2) riječi: „ili maloljetnika“ brišu se.

Stav (3) mijenja se i glasi:

„(3) Ako je krivičnim djelom iz st. (1) i (2) ovog člana dijete teško tjelesno ozlijeđeno ili mu je teško narušeno zdravlje ili se zbog krivičnog djela iz st. (1) ili (2) ovog člana dijete odalo prosjačenju, prostituciji ili drugim oblicima asocijalnog ponašanja ili delikvenciji, učinitelj će se kazniti kaznom zatvora od tri mjeseca do pet godina.“

### **Član 40.**

Iza člana 219. dodaje se novi član 219a. koji glasi:

#### **„Član 219a. (Povreda privatnosti djeteta)**

(1) Ko iznese ili prenese nešto iz osobnog ili porodičnog života djeteta ili suprotno propisima objavi djetetovu fotografiju ili otkrije identitet djeteta i time kod djeteta stvori stanje uznemirenosti ili ga izloži poruzi vršnjaka ili drugih osoba ili na neki drugi način ugrozi dobrobit djeteta, kaznit će se novčanom kaznom ili kaznom zatvora do jedne godine.



(2) Ko djelo iz stava (1) ovog člana izvrši putem sredstava masovne komunikacije, kompjuterskog sistema ili mreže, na javnom skupu ili na drugi način, zbog čega je ono postalo pristupačno većem broju osoba, kaznit će se novčanom kaznom ili kaznom zatvora do tri godine.

(3) Ko djelo iz st. (1) i (2) ovog člana učini kao službena osoba ili u obavljanju profesionalne djelatnosti, kaznit će se novčanom kaznom ili kaznom zatvora do tri godine.“

#### **Član 41.**

U članu 220. riječi: „tri godine“ zamjenjuju se riječima: „pet godina“.

#### **Član 42.**

Član 222. mijenja se i glasi:

#### **„Član 222. (Nasilje u porodici)**

(1) Ko nasiljem, drskim ili bezobzirnim ponašanjem ugrožava mir, tjelesnu cjelovitost ili psihičko zdravlje člana svoje porodice ili bliske osobe ili joj nanosi ekonomsku štetu kaznit će se kaznom zatvora do jedne godine.

(2) Ko krivično djelo iz stava (1) ovog člana učini prema članu porodice ili prema bliskoj osobi s kojom živi u zajedničkom domaćinstvu, kaznit će se kaznom zatvora do tri godine.

(3) Ako je pri učinjenju krivičnog djela iz st. (1) i (2) ovog člana upotrijebljeno oružje, opasno oruđe ili drugo sredstvo prikladno teško ozlijediti tijelo ili narušiti zdravlje, učinitelj će se kazniti kaznom zatvora od tri mjeseca do tri godine.

(4) Ako je krivičnim djelom iz st. od (1) do (3) ovog člana, član porodice ili bliska osoba teško tjelesno ozlijeđena ili joj je zdravlje teško narušeno ili ako je krivično djelo iz st. (1) do (3) ovog člana učinjeno prema djetetu, učinitelj će se kazniti kaznom zatvora od jedne do pet godina.

(5) Ako je krivičnim djelom iz st. (1) do (4) ovog člana prouzrokovana smrt člana porodice ili bliske osobe, učinitelj će se kazniti kaznom zatvora od dvije do 15 godina.“

#### **Član 43.**

Iza člana 222. dodaje se novi član 222a. koji glasi:

#### **„Član 222a. (Rodoskrnuće )**

(1) Ko izvrši spolni odnošaj ili s njim izjednačenu spolnu radnju s krvnim srodnikom u pravoj liniji ili s bratom ili sestrom, kaznit će se novčanom kaznom ili kaznom zatvora od tri mjeseca do tri godine.

(2) Ko djelo iz stava (1) ovog člana učini s djetetom, kaznit će se kaznom zatvora od jedne do deset godina.“

#### **Član 44.**

U članu 224. riječi: „maloljetnika“ zamjenjuju se riječima: „djeteta“.

#### **Član 45.**

U članu 231. stav (5) riječi: „umrle maloljetne“ zamjenjuju se riječima: „umrlog djeteta ili umrle“.

#### **Član 46.**

Član 237. mijenja se i glasi:

#### **„Član 237.**

(Služenje alkoholnih pića djetetu)

Ko u ugostiteljskom objektu ili drugom objektu u kojem se prodaju alkoholna pića posluži djetetu žestoko alkoholno piće ili ga posluži drugim alkoholnim pićem u količinama koje mogu izazvati pijanstvo djeteta, kaznit će se novčanom kaznom ili kaznom zatvora do šest mjeseci.“

#### **Član 47.**

U članu 239. stav (2) iza riječi „djetetu“ riječ „maloljetniku“ briše se.

#### **Član 48.**

U članu 345. stav (4) riječi: „ili maloljetniku“ brišu se.

#### **Član 49.**

Iza člana 359a. dodaje se novi član 359b. koji glasi:

#### **„359b.**

(Prinuda prema zdravstvenom radniku)

(1) Ko doktora medicine, doktora stomatologije ili drugog zdravstvenog radnika koji zdravstvenu djelatnost obavlja kao javnu službu silom ili prijetnjom da će izravno upotrijebiti silu spriječiti u obavljanju njegove zdravstvene djelatnosti ili ga prisili na izvršenje postupka ili intervencije koji nisu u skladu s pravilima medicinske struke ili etike, kaznit će se kaznom zatvora od tri mjeseca do tri godine.

(2) Ako je krivičnim djelom iz stava (1) ovog člana doveden u opasnost život ili tijelo doktora medicine, doktora stomatologije ili drugog zdravstvenog radnika ili mu je nanesena tjelesna ozljeda ili je upotrijebljeno oružje ili opasno oruđe, učinitelj će se kazniti kaznom zatvora od šest mjeseci do pet godina.

(3) Ako je učinitelj krivičnog djela iz st. (1) i (2) ovog člana bio izazvan protuzakonitim ili grubim ponašanjem doktora medicine, doktora stomatologije ili drugog zdravstvenog radnika može se osloboditi od kazne.“

## **Član 50.**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**O B R A Z L O Ž E N J E**  
**NACRTA ZAKONA O IZMJENAMA I DOPUNAMA KRIVIČNOG ZAKONA**  
**FEDERACIJE BOSNE I HERCEGOVINE**

**I. – USTAVNI OSNOV**

Ustavnopravni osnov za donošenje ovog zakona sadržan je u odredbama člana IV. A. 20. (1) d) Ustava Federacije Bosne i Hercegovine. Naime, prema odredbama člana IV. A. 20. (1) d) Ustava Federacije BiH, Parlament Federacije BiH nadležan je za donošenje zakona o vršenju funkcije federalne vlasti, iz čega proizilazi da navedena odredba predstavlja ustavnopravni osnov za njegovo donošenje.

**II. – RAZLOZI ZA DONOŠENJE ZAKONA**

Konvencija Vijeća Evrope o prevenciji i borbi protiv nasilja nad ženama i nasilja u porodici ("Službeni glasnik BiH – Međunarodni ugovori", broj 19/13) je usvojena 11. maja 2011. godine u Istanbulu, Republika Turska. Naime, nakon niza preporuka Vijeća Evrope o zabrani diskriminacije temeljem spola i zaštiti od nasilja koje su imale za cilj postavljanja zajedničkih ciljeva i minimuma zajedničkih standarda za države članice, ali nisu imale pravno obavezujući efekt, Konvencija predstavlja prvi pravno obavezujući akt Vijeća Evrope u oblasti sprječavanja i borbe protiv nasilja nad ženama. Ovaj akt ne mora biti direktno primjenjiv u državama potpisnicama, ali zahtijeva posebno prilagođavanje zakonskih i institucionalnih okvira država potpisnica radi njene uspješne implementacije. Bosna i Hercegovina je 07. novembra 2013. godine postala 6. zemlja članica Vijeća Evrope koja je ratificirala Konvenciju, čime se obvezala na poduzimanje zakonodavnih i drugih mjera radi osiguranja pravnog, institucionalnog i organizacijskog okvira za prevenciju nasilja nad ženama, zaštitu žrtava nasilja te kažnjavanje počinitelaca nasilja.

Konvenciju Vijeća Evrope o zaštiti djece od seksualnog iskorištavanja i seksualne zloupotrebe je usvojena dana 25.10.2007. godine u Lanzarotu, Kraljevina Španjolska. Konvencija je u Bosni i Hercegovini stupila na snagu 01.03.2013. godine ("Službeni glasnik BiH", broj 11/12) (u daljnjem tekstu: Istarska konvencija). Svrha ove Konvencije je spriječiti i suzbijati seksualno iskorištavanje i seksualnu zloupotrebu djece, zaštititi prava djece žrtava seksualnog iskorištavanja i seksualne zloupotrebe i unaprijediti nacionalnu i međunarodnu suradnju protiv seksualnog iskorištavanja i zloupotrebe djece. Seksualno iskorištavanje i seksualno zlostavljanje su među najtežim oblicima nasilja nad djecom. Procijenjeno je da je jedno od pet djece žrtva nekog oblika seksualnog nasilja u Evropi i u oko 80% slučajeva zlostavljač je netko koga dijete dobro zna. Seksualno nasilje nad djecom može se javiti u različitim oblicima; seksualno zlostavljanje u porodici ili u krugu onih kojima dijete vjeruje, seksualno zlostavljanje kroz prostituciju ili sadržaje koji prikazuju seksualno zlostavljanje, seksualno zlostavljanje potpomognuto internetom, ili seksualni napadi vršnjaka. Konvencija predstavlja veliki iskorak kada je u pitanju prevencija seksualnog nasilja nad djecom. Nadograđujući se na postojeće međunarodne i regionalne pravne standarde, Konvencija ih proširuje kako bi se obuhvatila i kriminalizirala sva seksualna krivična djela izvršena nad djecom, bez obzira da li se ta djela vrše radi zarade ili ne.

Obzirom da nakon ratifikacije Konvencija Vijeća Evrope o prevenciji i borbi protiv nasilja nad ženama i nasilja u porodici i Konvenciju Vijeća Evrope o zaštiti djece od seksualnog iskorištavanja i seksualne zloupotrebe, predmetne konvencije nisu bile

inkorporirane u krivično zakonodavstvo Federacije Bosne i Hercegovine, pristupilo izradi sveobuhvatnih izmjena i dopuna Krivičnog zakona Federacije Bosne i Hercegovine s ciljem unaprjeđenja zaštite djece, žena i porodice kao jezgre društva.

### **III. – USKLAĐENOST PROPISA S EVROPSKIM ZAKONODAVSTVOM**

Prilikom izrade prednacrtu navedenog zakona, Federalno ministarstvo pravde je imalo u vidu Uredbu o Uredu Vlade Federacije BiH za zakonodavstvo i usklađenost s propisima Evropske unije („Službene novine Federacije BiH“, broj: 26/20) i Uredbu o postupku usklađivanja zakonodavstva Federacije BiH s pravnom stečevinom Evropske unije („Službene novine Federacije BiH“, broj: 98/16) i u tom smislu je izvršilo analizu evropske pravne stečevine, naročito sekundarnih izvora evropskoga prava, s kojima je i vršeno ciljano usklađivanje. U skladu sa navedenim, Nacrt zakona o izmjenama i dopunama Krivičnog zakona Federacije Bosne i Hercegovine je u potpunosti usklađen s Konvencijom Vijeća Evrope o prevenciji i borbi protiv nasilja nad ženama i nasilja u porodici i Konvencijom Vijeća Evrope o zaštiti djece od seksualnog iskorištavanja i seksualne zloupotrebe.

### **IV. – OBRAZLOŽENJE PREDLOŽENIH ZAKONSKIH RJEŠENJA**

Članom 1. Nacrta zakona o izmjenama i dopunama Krivičnog zakona Federacije Bosne i Hercegovine mijenja se član 2. stav (12) i propisuje da je dijete osoba koja nije navršila 18 godina života, dok se izmijenjenim stavom (13) propisuje se da je mlađa punoljetna osoba ona osoba koja je u vrijeme počinjenja krivičnog djela navršila 18 a nije navršila 21 godinu života, čime se vrši usklađivanje s članom 3. Konvencije Vijeća Evrope o zaštiti djece od seksualnog iskorištavanja i seksualne zloupotrebe. Stavom (14) uvodi se nova definicija članova porodice, definicija bliske osobe, te definicija životnog partnera. Propisano je da su članovi porodice bračni ili vanbračni partner, njihova zajednička djeca, te djeca svakog od njih, srodnik po krvi u pravoj liniji, srodnik u pobočnoj liniji zaključno do trećeg stepena, srodnici po tazbini zaključno do drugog stupnja, usvojilac ili usvojenik. Stavom (15) definirano je da su bliske osobe članovi porodice, bivši bračni ili vanbračni partner, životni partner, bivši životni partner, sadašnji i bivši partner u intimnoj vezi i osobe koje imaju zajedničko dijete, dok je stavom (16) definirano da je životni partner osoba koja s drugom osobom živi u zajednici koja ima trajniji karakter.

Članom 2. predmetnog nacrtu, vrši se izmjena naziva člana 9. i isti se usaglašava sa sadržajem istog, obzirom da se krivično zakonodavstvo u Federaciji Bosne i Hercegovine ne primjenjuje prema djetetu koje u vrijeme počinjenja krivičnog djela nije navršilo 14 godina života.

Članom 3. mijenja se član 10. važećeg zakona, te se propisuje da se ovaj zakon, ako posebnim zakonom nije drugačije propisano, primjenjuje prema osobi koja je u vrijeme počinjenja krivičnog djela navršila 14 godina a nije navršila 21 godinu života, obzirom na činjenicu da je 2014. godine na snagu stupio Zakon o zaštiti i postupanju sa djecom i maloljetnicima u krivičnom postupku te da se ovim zakonskim nacrtom briše glava X. (Pravila o odgojnim preporukama, o odgojnim mjerama i o kažnjavanju maloljetnika).

Članom 4. propisuje se da odredbe opšteg dijela ovog zakona primjenjuju prema djeci starijoj od 14 godina i mlađim punoljetnim osobama, osim ako posebnim zakonom nije drugačije propisano.

Članom 5. vrši se intervencija u član 16. kojim je propisan tok i prekid zastarjelosti krivičnog gonjenja, te se vrši usklađivanje s Konvencijom Vijeća Evrope o zaštiti djece od seksualnog iskorištavanja i seksualne zloupotrebe na način da se propisuje da za krivična djela trgovine ljudima i organizirane trgovine ljudima, krivična djela protiv polne slobode i morala, krivična djela polnog zlostavljanja i iskorištavanja djeteta, i krivična djela protiv braka, porodice i mladeži počinjenja na štetu djeteta, zastarjelost krivičnog gonjenja počinje teći od punoljetstva žrtve, što predstavlja dodatan instrument za zaštitu žrtve i jamstvo krivičnog progona počinitelaca ovih krivičnih djela.

Članom 6. ovog zakonskog nacrtu, u članu 41. kojim se propisuju vrste kazni (kazna zatvora, kazna dugotrajnog zatvora i novčana kazna), dodaje se novi stav (2) te se propisuje da se počiniocu krivičnog djela iz koristoljublja novčana kazna može izreći kao sporedna i kada nije propisana zakonom ili kada je propisano da će se počinitelac kazniti kaznom zatvora ili novčanom kaznom, a sud kao glavnu izrekne kaznu zatvora.

Članom 7. vrši se intervencija u član 43. stav (3), te se propisuje da se kazna zatvora, koja ne može biti kraća od 30 dana niti duža od 20 godina, ne može izreći djeci starijoj od 14 godina. Propisuje se da se djeci starijoj od 14 godina može izreći kazna maloljetničkog zatvora pod uslovima propisanim posebnim zakonom, čime se ovaj član usklađuje sa Zakonom o zaštiti i postupanju s djecom i maloljetnicima u krivičnom postupku.

Članom 8. vrši se intervencija u član 51. stav (1) tačka e) te se propisuje da će sud ublažiti kaznu za krivično djelo za koje je propisana kazna zatvora do jedne godine na kaznu zatvora u trajanju do 30 dana.

Članom 9. u članu 54. stav (5) vrši se tehničko usklađivanje na način da se iza riječi „jedinstvenu kaznu“ dodaje se riječ: „zatvora“.

Članom 10. briše se Glava X. – PRAVILA O ODGOJNIM PREPORUKAMA, O ODGOJNIM MJERAMA I O KAŽNJAVANJU MALOLJETNIKA, odnosno čl. 79. do 109., obzirom da je na snagu stupio Zakon o zaštiti i postupanju s djecom i maloljetnicima u krivičnom postupku.

Članom 11. briše se kazna maloljetničkog zatvora, jer se ovaj član odnosi na izvršenje kazne zatvora (a izvršenje maloljetničkog zatvora je regulirano članom 113.)

Članom 12. vrši se intervencija na član 112. tako što se stav (1) mijenja te se propisuje da osoba koja je osuđena na kaznu zatvora, ili kaznu dugotrajnog zatvora, koja je sposobna za rad može raditi ukoliko na to pristane. Brisanjem odrednice o kazni maloljetničkog zatvora iz važeće odredbe vrši se usklađivanje sa Zakonom o zaštiti i postupanju s djecom i maloljetnicima u krivičnom postupku.

Članom 13. u članu 113. stav (1) se mijenja u skladu sa značenjima izraza u ovom zakonu i u skladu sa nazivom ustanova u kojima se izvršava kazna maloljetničkog zatvora.

Članom 14. vrši se intervencija u član 121. stav (1) te se institut rehabilitacije usklađuje sa Zakonom o zaštiti i postupanju s djecom i maloljetnicima u krivičnom postupku.



Članom 15. vrši se intervencija na član 125. stav (4) te se propisuje da se osuda za kaznu dugotrajnog zakona i osuda zbog krivičnih djela polnog zlostavljanja i iskorištavanja djeteta ne briše, čime se šalje jasna društvena osuda počiniocima krivičnih djela polnog zlostavljanja i iskorištavanja djeteta i čime se dijete kao ranjiva kategorija dodatno štiti.

Članom 16. vrši se intervencija na član 166. stav (2) te se propisuje da će se kaznom zatvora najmanje deset godina ili kaznom dugotrajnog zatvora kazniti onaj tko usmrti člana porodice ili blisku osobu koju je prethodno zlostavljao i tko usmrti dijete ili trudnu ženu, čime se vrši usklađivanje s članom 35. Istambulske konvencije.

Članom 17. vrši se intervencija u član 170. stavom (1) kojim se propisuje krivično djelo učestvovanja u samoubojstvu, te se propisuje da će se kaznom zatvora od šest mjeseci do pet godina kazniti tko navede drugog na samoubistvo ili mu pomogne u samoubistvu, pa ono bude počinjeno ili pokušano. Stavom (2) propisuje se da će se počinitelj, ukoliko predmetno djelo počini prema djetetu ili prema osobi čija je sposobnost shvatanja značenja svog djela ili upravljanja svojim postupcima bitno smanjena, kazniti kaznom zatvora od jedne do deset godina. Također, stavom (3) se propisuje da će se počinitelj koji počini djelo iz stava (1) ovog člana prema djetetu koje nije navršilo 14 godina ili prema osobi koja nije mogla shvatiti značaj svog djela ili upravljati svojim postupcima, kazniti u skladu s članom 166. (ubistvo) stav (1) ovoga zakona. Stavom (4) predmetnog člana propisuje se da će se kaznom zatvora od šest mjeseci do pet godina kazniti tko okrutno ili nečovječno postupa s osobom koja se prema njemu nalazi u odnosu kakve podređenosti ili zavisnosti i time iz nehata izazove samoubistvo ili pokušaj samoubistva te osobe. U predmetnom članu pojam maloljetnik zamjenjuje se pojmom djeteta koje je navršilo 14 godina, te se vrši usklađivanje s članom 33. Istambulske konvencije.

Članom 18. vrši se intervencija u član 171., te se krivično djelo protivpravnog prekida trudnoće usklađuje s članom 39. i 46. Istambulske konvencije.

Članom 19. vrši se izmjena člana 172. kojim se propisuje krivično djelo teške fizičke povrede. U odnosu na važeći član najznačajnije izmjene su obuhvaćene stavom (4) koji predstavlja uvođenje kvalificiranog oblika krivičnog djela iz st. (1) do (3) ovoga člana ako je isto počinjeno prema djetetu, trudnoj ženi, članu porodice ili bliskoj osobi koju je počinitelj prethodno zlostavljao ili prema osobi koja je posebno ranjiva zbog teže fizičke ili duševne smetnje ili iz mržnje.

Članom 20. vrši se intervencija u član 173. stav (2) te se uvodi kvalificirana okolnost za počinitelja krivičnog djela laka fizička povreda ukoliko isto počini prema članu porodice ili bliskoj osobi, prema djetetu ili trudnoj ženi, osobi koja je posebno ranjiva zbog njezine teže fizičke ili duševne smetnje ili iz mržnje. Predmetnim članom briše se stav (3) člana 173. čime se vrši usklađivanje sa članom 60. stav (1) važećeg zakona, obzirom da se sudska opomena može izreći za krivična djela s propisanom kaznom zatvora do jedne godine ili novčanom kaznom.

Članom 21. dodaju se novi čl. 173a. Sakaćenje ženskih spolnih organa i 173b. Prinudna sterilizacija čime se vrši usklađivanje predmetnog zakona sa čl. 38., 39. i 46. Istambulske konvencije.



Članom 22. dodaje se novi član 179a. Uhođenje kojim se vrši usklađivanje predmetnog zakona sa članom 34. Istambulske konvencije.

Članom 23. vrši se intervencija u član 180. stav (2), te se brišu riječi ili maloljetniku čime se vrši usklađivanje sa definicijom pojma djeteta.

Članom 24. dodaje se novi član 181a. te se propisuje krivično djelo Psihičkog nasilja čime se vrši usklađivanje s čl. 33. i 35. Istambulske konvencije.

Članom 25. vrši se intervencija u član 183. na način da se briše stav (3) obzirom da su odredbe koje propisuje predmetni stav inkriminirane krivičnim djelo Uhođenje.

Članom 26. vrši se intervencija u član 189. Neovlašteno optičko snimanje i briše se stav (3) obzirom da je isti obuhvaćen krivičnim djelom Iskorištavanje djeteta radi pornografije. Također, predmeti koji su bili namijenjeni ili upotrijebljeni za počinjenje krivičnog djela iz st. (1) i (2) ovoga člana i predmeti koji su nastali počinjenjem tih krivičnih djela oduzet će se.

Članom 27. vrši se intervencija u važeći zakon tako što se uvodi novi član 189a. i novo krivično djelo Zloupotreba snimke polno eksplicitnog sadržaja, čime krivično zakonodavstvo Federacije BiH prati razvoj tehnologije i malicioznih društvenih ponašanja.

Članom 28. mijenja se važeći član 203. kojim je definirano krivično djelo Silovanja i isto se u potpunosti usklađuje s članom 36. Istambulske konvencije.

Članom 29. dodaje se novi član 203a. (Spolno uznemiravanje) koje je u potpunosti usklađeno s članom 40. Istambulske konvencije

Članom 30. vrši se intervencija u važeći zakon tako što se čl. 204, 205. i 206. kojima su propisana krivična djela Spolni odnos s nemoćnom osobom, Spolni odnos zloupotrebom položaja i Prinuda na spolni odnos brišu, obzirom da su ista obuhvaćena krivičnim djelom Silovanje, a član 207. (Spolni odnos s djetetom) se briše obzirom da se isti kriminalizira članom 210c. predmetnog nacrta.

Članom 31. izmijenjen je član 208. (Bludne radnje) na način da je propisano da će se u slučajevima iz člana 203. (Silovanje) ovoga zakona, kada nije počinjen ni pokušaj tog krivičnog djela, onaj tko počini samo bludnu radnju kazniti kaznom zatvora od tri mjeseca do tri godine, dok će se počinitelj predmetnog djela prema djetetu starijem od 15 godina kazniti kaznom zatvora do tri godine. A ako djelo iz stava (2) počini srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojilac, staralac, nastavnik, odgojitelj, liječnik, vjerski službenik ili druga osoba kojoj je dijete povjereno radi učenja, odgoja, čuvanja, staranja ili njege, počinitelj će se kazniti kaznom zatvora od šest mjeseci do pet godina. Predmetnim stavom zakonodavac, uvodeći kvalificirani oblik ovog djela obzirom na bliskost i status osoba koje su počinile krivično djelo, dodatno štiti dijete starije od 15 godina.

Članom 32. briše se član 209. kojim je definirano krivično djelo Zadovoljenje pohote pred djetetom ili maloljetnikom, obzirom da je isto propisano novim članom 210f.

Članom 33. iza Glave XIX. - Krivična djela protiv spolne slobode i morala dodaje se nova Glava XIXa. - Krivična djela spolnog zlostavljanja i iskorištavanja djeteta. Članom 210c. uvodi se krivično djelo Spolni odnošaj s djetetom mlađim od 15 godina koje je u potpunosti usklađeno s članom 18. Lanzarote konvencije. Također, članom 210d. uvodi se krivično djelo Spolna zlostupotreba djeteta starijeg od 15 godina koji je također usklađeno s članom 18. Lanzarote konvencije, dok je članom 210e. uvedeno krivično djelo Mamljenje djece za zadovoljenje spolnih potreba, koje u potpunosti usklađeno s članom 23. Lanzarote konvencije. Članom 210f. uvodi se krivično djelo Zadovoljenje pohote pred djetetom koje je u potpunosti usklađeno s članom 22. Lanzarote konvencije, članom 210g. krivično djelo Navođenje djeteta na prostituciju koje u potpunosti usklađeno s članom 19. i 28. Lanzarote konvencije, članom 210h. Iskorištavanje djeteta radi pornografije koji je u potpunosti usklađen s članom 20. i 28. Lanzarote konvencije, član 210i. krivično djelo Iskorištavanja djeteta za pornografske predstave koje je u potpunosti usklađeno s članom 21. Lanzarote konvencije i član 210j. krivično djelo Upoznavanje djeteta s pornografijom koje je u potpunosti usklađeno s članom 20. Lanzarote konvencije.

Članom 34. brišu se čl. 211, 212. i 213., obzirom da je član 211. obuhvaćen članom 210h., da je član 212. obuhvaćen članom 210j., i da je član 213. obuhvaćen članom 222a.

Članom 35. iza člana 215. dodan je novi član 215a. kojim se uvodi krivično djelo Prinudno sklapanje braka koje je u potpunosti usklađeno s članom 37. Istambulske konvencije.

Članom 36. izvršena je izmjena krivičnog djela Vanbračne zajednice s djetetom koje nije navršilo 16 godina, te je definirano da će se punoljetna osoba koja vanbračno živi s djetetom koje nije navršilo 16 godina života, a time ne čini neko drugo krivično djelo za koje je propisana teža kazna, kazniti kaznom zatvora do tri godine.

Članom 37. izvršena je izmjena krivičnog djela iz člana 217., te je izvršeno usklađivanje sukladno definiciji djeteta.

Članom 38. izvršena je intervencija u član 218. odnosno usklađivanje krivične politike za krivično djelo Promjena porodičnog stanja.

Članom 39. izvršeno je usklađivanje krivičnog djela iz člana 219. Zapuštanje ili zlostavljanje djeteta sukladno definiciji pojma djeteta.

Članom 40. iza člana 219. dodan je novi član 219a., te je uvedeno novo krivično djelo Povreda privatnosti djeteta, koje je u potpunosti usklađeno s Konvencijom o pravima djeteta. Predmetnom odredbom štiti se pravo djeteta na privatnost i porodični život, što je od iznimnog značaja obzirom na ubrzani razvoj sredstava masovne komunikacije i kompjuterskih mreža.

Članom 41. vrši se intervencija u član 220., odnosno vrši se usklađivanje kaznene politike za krivično djelo napuštanje djeteta.

Članom 42. mijenja se član 222. kojim je propisano krivično djelo Nasilje u porodici te se propisuje da će se kaznom zatvora do jedne godine kazniti osoba koja nasiljem,

drskim ili bezobzirnim ponašanjem ugrožava mir, fizičku cjelovitost ili psihičko zdravlje člana svoje porodice ili bliske osobe ili joj nanosi ekonomsku štetu. Dakle, postojeće krivično djelo je usklađeno s pojmom bliske osobe, te prošireno posljedicom nanošenja ekonomske štete. Stavom (2) predviđeno je da će se kaznom zatvora do tri godine kazniti osoba koja krivično djelo Nasilja u porodici počini prema članu porodice ili prema bliskoj osobi s kojom živi u zajedničkom domaćinstvu sukladno definiciji pojma bliske osobe. Stavom (3) propisan je kvalificirani oblik počinjenja krivičnog djela iz st. (1) i (2) obzirom na sredstvo izvršenja krivičnog djela, dok je stavom (4) propisano da će se počinitelj kazniti kaznom zatvora od jedne do pet godina ako je krivičnim djelom iz st. od (1) do (3) član porodice ili bliska osoba teško fizičko povrijeđena ili joj je zdravlje teško narušeno ili ako je djelo počinjeno prema djetetu. Stavom (5) propisano je da će se počinitelj kazniti kaznom zatvora od dvije do 15 godina ako je krivičnim djelom iz st. od (1) do (4) prouzrokovana smrt člana porodice ili bliske osobe.

Članom 43. iza člana 222. dodaje se novi član 222a. Rodoskvrnuće te je propisano da će se novčanom kaznom ili kaznom zatvora od tri mjeseca do tri godine kazniti tko izvrši spolni odnošaj ili s njim izjednačenu spolnu radnju s krvnim srodnikom u pravoj liniji ili s bratom ili sestrom. Stavom (2) propisan je kvalificirani oblik ovog djela ukoliko se isto počini prema djetetu.

Čl. 44. i 45. izvršena je intervencija u čl. 224. i 231. stav (5) obzirom na definiciju djeteta.

Članom 46. izvršena je izmjena člana 237. kojim je propisano krivično djelo Služenja alkoholnih pića djetetu, te je isto usklađeno s pojmom djeteta.

Čl. 47. i 48. izvršena je intervencija u član 239. stav (2) i 345. stav (4), te su isti usklađeni s pojmom djeteta.

Članom 49. dodaje se novi član 239b. i novo krivično djelo Prinuda prema zdravstvenom djelatniku, kojim se štiti obavljanje zdravstvene djelatnosti kao javne službe, obzirom na sve učestalije napade ili prijetnje napadima na zdravstvene djelatnike.

Članom 50. propisuje se stupanje na snagu ovog zakona.

## **V. – FINANSIJSKA SREDSTVA**

Za provođenje ovog zakona nije potrebno osigurati dodatna sredstva u Budžetu Federacije Bosne i Hercegovine.

## KRIVIČNI ZAKON FEDERACIJE BOSNE I HERCEGOVINE

(„Službene novine Federacije BiH“, br. 36/03, 21/04 - ispr., 69/04, 18/05, 42/10, 42/11, 59/14, 76/14, 46/16 i 75/17)

### ODREDBE KOJE SE MIJENJAJU / DOPUNJUJU / BRIŠU

#### Član 2

##### Značaj izraza u ovom zakonu

- (1) Krivično zakonodavstvo u Federaciji sačinjavaju krivičnopravne odredbe sadržane u ovom zakonu, drugim zakonima Federacije i zakonima kantona.
- (2) Teritorija Federacije je kopnena teritorija, obalno more i vodene površine unutar njenih granica, te zračni prostor nad njima.
- (3) Službena osoba je izabrani ili imenovani službenik ili druga službena osoba u organima zakonodavne, izvršne i sudske vlasti i u drugim organima uprave i službama za upravu Federacije, kantona, gradova i općina koje obavljaju određene upravne, stručne i druge poslove u okviru prava i dužnosti vlasti koja ih je osnovala; osoba koja stalno ili povremeno vrši službenu dužnost u navedenim organima i tijelima; ovlaštena osoba u privrednom društvu ili u drugoj pravnoj osobi kojoj je zakonom ili drugim propisom donesenim na osnovu zakona povjereno obavljanje javnih ovlaštenja, a koja u okviru tih ovlasti obavlja određenu funkciju; te druga osoba koja obavlja određenu službenu funkciju na osnovu ovlaštenja iz zakona ili drugog propisa donesenog na osnovu zakona.
- (4) Vojna osoba, u smislu ovog Zakona, je profesionalna vojna osoba i osoba u rezervnom sastavu dok je na službi u Oružanim snagama Bosne i Hercegovine, u skladu sa Zakonom o službi u Oružanim snagama Bosne i Hercegovine.
- (5) Kad je kao učinitelj pojedinog krivičnog djela označena službena osoba ili vojna osoba, osobe iz stava 3. ovog člana mogu biti učinitelji tih djela, ako iz obilježja pojedinog krivičnog djela ili iz pojedinog propisa ne proizilazi da učinitelj može biti samo neka od tih osoba.
- (6) Odgovorna osoba je osoba u privrednom društvu ili u drugoj pravnoj osobi kojoj je s obzirom na njenu dužnost ili na osnovu posebne ovlasti povjeren određeni krug poslova koji se odnose na primjenu zakona ili propisa donesenih na osnovu zakona, ili općeg akta privrednog društva ili druge pravne osobe u upravljanju i rukovanju imovinom, ili se odnose na rukovođenje proizvodnjom ili nekom drugom privrednom djelatnošću ili na

nadzor nad njima. Odgovornom osobom smatra se i službena osoba u smislu stava 3. ovog člana kad su u pitanju radnje čijim je učiniteljem označena odgovorna osoba, a nisu propisane kao krivično djelo odredbama glave o krivičnim djelima protiv službene i druge odgovorne funkcije ili odredbama o krivičnim djelima čiji je učinitelj službena osoba propisanim u nekoj drugoj glavi ovog zakona ili drugim zakonom Federacije ili kantona.

(7) Kad je kao učinitelj krivičnih djela označena službena ili odgovorna osoba, sve osobe iz st. 3. i 5. ovog člana mogu biti učinitelji tih djela, ako iz zakonskih obilježja pojedinog krivičnog djela ne proizlazi da učinitelj može biti samo neka od tih osoba.

(8) Strana službena osoba je član zakonodavnog, izvršnog, upravnog ili sudskog organa strane države, javni službenik međunarodne organizacije i njezinih tijela, sudija i drugi službenik međunarodnog suda.

(9) Sudija porotnik je osoba koja je član kolegijalnog tijela koje ima odgovornost odlučivanja o krivnji optužene osobe i izricanja krivično-pravne sankcije u postupku suđenja.

(10) Arbitar je osoba koja je, na osnovu sporazuma o arbitraži, pozvana da donese pravno obavezujuću odluku u sporu koji mu podnesu stranke sporazuma.

(11) Krivično djelo iz mržnje je svako krivično djelo učinjeno zbog rasne pripadnosti, boje kože, vjerskog uvjerenja, nacionalnog ili etničkog porijekla, jezika, invaliditeta, spola, seksualne orijentacije ili rodnog identiteta druge osobe. Takvo postupanje uzet će se kao otežavajuća okolnost ako ovim zakonom nije izričito propisano teže kažnjavanje za kvalifikovani oblik krivičnog djela učinjenog iz mržnje."

(12) Dijete je, u smislu ovog zakona, osoba koja nije navršila četrnaest godina života.

(13) Maloljetnik je, u smislu ovog zakona, osoba koja nije navršila osamnaest godina života.

(14) Pravna osoba je, u smislu ovog zakona, Bosna i Hercegovina, Federacija, Republika Srpska, Distrikt Brčko Bosne i Hercegovine, kanton, grad, općina, mjesna zajednica, svaki organizacioni oblik privrednog društva i svi oblici povezivanja privrednih društava, ustanova, ustanova za obavljanje kreditnih i drugih bankarskih poslova ili za osiguranje osoba i imovine, te druge finansijske institucije, fond, političke stranke, udruženja građana i drugi oblici udruživanja koji mogu sticati sredstva i koristiti ih na isti način kao i svaka druga institucija ili organ koji ostvaruje i koristi sredstva i kojem je zakonom priznato svojstvo pravne osobe.

(15) Privredno društvo je, u smislu ovog zakona, korporacija, poduzeće, ortakluk i svaki organizacioni oblik registriran za obavljanje privredne aktivnosti.

(16) Udruženje je bilo koji oblik udruživanja tri ili više osoba.

(17) Više osoba je najmanje dvije osobe.

(18) Skupina ljudi je najmanje pet osoba.

(19) Grupa ljudi je udruženje od najmanje tri osobe koje su povezane radi trajnog, ponovljenog ili povremenog činjenja krivičnih djela, pri čemu svaka od tih osoba učestvuje u učinjenju krivičnog djela.

(20) Organizirana grupa ljudi je grupa ljudi koja je formirana, a nije nastala spontano, radi izravno slijedećeg učinjenja krivičnog djela, čiji članovi ne moraju imati formalno određene uloge, koja ne mora imati slijed članstva niti razvijenu organizaciju.

(21) Grupa za organizirani kriminal je organizirana grupa ljudi od najmanje tri osobe, koja postoji neko vrijeme, djelujući u cilju učinjenja jednog ili više krivičnih djela za koja se po zakonu može izreći kazna zatvora preko tri godine ili teža kazna.

(22) Izbjeglica ili raseljena osoba je, u smislu ovog zakona, osoba koja je napustila svoju imovinu na području Federacije u vremenu između 30. aprila 1991. godine i 4. aprila 1998. godine, za koju se pretpostavlja da je izbjeglica ili raseljena osoba po Aneksu 7. Općeg okvirnog sporazuma za mir u Bosni i Hercegovini.

(23) Članovi porodice, u smislu ovog zakona, jesu: bračni i izvanbračni drug, bivši bračni i izvanbračni drug, krvni rođak u ravnoj liniji, usvojitelj i posvojenik, rođak u pobočnoj liniji do trećeg stepena zaključno i srodnik po tazbini do drugog stepena zaključno.

(24) Tajna Federacije, kantona, grada i općine je podatak ili isprava koja je zakonom, drugim propisom ili općim aktom nadležnog tijela donesenim na osnovu zakona, određena tajnom Federacije, čijim bi otkrivanjem nastupile štetne posljedice za Federaciju, kanton, grad i općinu.

(25) Vojna tajna je podatak ili isprava koja je zakonom, drugim propisom ili aktom nadležnog organa Federacije donesenim na osnovu zakona proglašena vojnom tajnom.

(26) Službena tajna je podatak ili isprava koja je zakonom, drugim propisom ili općim aktom nadležne institucije u Federaciji, kantonu, gradu i općini donesenim na osnovu zakona proglašena službenom tajnom.

(27) Poslovna tajna je podatak ili isprava koja je zakonom, drugim propisom ili općim aktom privrednog društva, ustanove ili druge pravne osobe određen poslovnom tajnom, a koji predstavlja proizvodnu tajnu, rezultate istraživačkog ili konstrukcijskog rada, te drugi podatak zbog čijeg bi priopćavanja neovlaštenoj osobi mogle nastupiti štetne posljedice za njezine privredne interese.

(28) Profesionalna tajna je podatak o osobnom ili obiteljskom životu stranaka koji saznaju odvjetnici, branitelji, notari, doktori medicine, doktori stomatologije, primalje ili drugi zdravstveni djelatnici, psiholozi, djelatnici staranja, vjerski ispovjednici i druge osobe u obavljanju svog zvanja.

(29) Isprava je svaki predmet koji je podoban ili određen da služi kao dokaz kakve činjenice koja je od značenja za pravne odnose.

(30) Novac je kovano ili papirnato sredstvo plaćanja koje je na osnovu zakona u opticaju u Bosni i Hercegovini ili u stranoj državi.

(31) Znaci za vrijednost podrazumijevaju i strane znakove za vrijednost.

(32) Pokretnina je i svaka proizvedena ili skupljena energija za davanje svjetlosti, topline ili kretanja, te telefonski i drugi impulsi.

(33) Prijevozno sredstvo je svako plovilo, vozilo i letjelica, kao i bilo kakvo drugo sredstvo koje se može koristiti za prijevoz u suhozemnom, vodenom ili zračnom prometu, bez obzira na vrstu pogona.

(34) Sila je i primjena hipnoze ili omamljujućih sredstava s ciljem da se ko protiv svoje volje dovede u nesvjesno stanje ili onesposobi za otpor.

(35) Opojna droga je medicinski lijek ili opasna supstanca s adiktivnim i psihotropnim svojstvima, ili supstanca koja se lahko može pretvoriti u takvu supstancu ako podliježe nadzoru po međunarodnoj konvenciji koju je Bosna i Hercegovina potvrdila, ili supstanca koja je proglašena opojnom drogom od nadležne institucije Bosne i Hercegovine ili nadležne institucije entiteta.

(36) Izražavanje u jednom gramatičkom rodu, muškom ili ženskom, uključuje oba roda fizičkih osoba.

## **Član 9**

### **Isključenje primjene krivičnog zakonodavstva u Federaciji prema djeci**

Krivično zakonodavstvo u Federaciji ne primjenjuje se prema djetetu koje u vrijeme učinjenja krivičnog djela nije navršilo četrnaest godina života.

## **Član 10**

### **Primjena krivičnog zakonodavstva u Federaciji prema maloljetnicima**

Krivično zakonodavstvo u Federaciji primjenjuje se prema maloljetnicima u skladu sa glavom X (Pravila o odgojnim preporukama, odgojnim mjerama i o kažnjavanju maloljetnika) ovog zakona i drugim zakonima u Federaciji.

## **Član 14**

### **Primjena općeg dijela ovog zakona**

(1) Odredbe općeg dijela ovog zakona primjenjuju se prema učiniteljima svih krivičnih djela propisanih zakonima u Federaciji.

(2) Odredbe općeg dijela ovog zakona primjenjuju se prema maloljetnicima, osim ako zakonom nije drukčije propisano.

(3) Odredbe općeg dijela ovog zakona primjenjuju se na pravne osobe, osim ako ovim zakonom nije drukčije propisano.

## **Član 16**

### **Tok i prekid zastarjelosti krivičnog gonjenja**

(1) Zastarijevanje krivičnog gonjenja počinje od dana kad je krivično djelo učinjeno. Zastarijevanje krivičnog gonjenja za krivična djela trajnog karaktera počinje teći u trenutku prestanka protivpravnog stanja.

(2) Zastarijevanje ne teče za vrijeme za koje se po zakonu krivično gonjenje ne može poduzeti ili nastaviti.

(3) Zastarijevanje se prekida svakom procesnom radnjom koja se poduzima radi gonjenja učinitelja zbog učinjenog krivičnog djela.

(4) Zastarijevanje se prekida i kad učinitelj, u vrijeme dok teče rok zastarjelosti, učini isto tako teško ili teže krivično djelo.

(5) Sa svakim prekidom zastarijevanje počinje ponovno teći.

(6) Zastarjelost krivičnog gonjenja nastupa u svakom slučaju kad protekne dvaput onoliko vremena koliko zakon propisuje za zastarjelost krivičnog gonjenja.

## **Član 41**

### **Vrste kazni**

Počinitelju krivičnog djela koji je kriv mogu se izreći: a) kazna zatvora; b) kazna dugotrajnog zatvora; c) novčana kazna.

## **Član 43**

### **Kazna zatvora**

(1) Kazna zatvora ne može biti kraća od 30 dana ni duža od 20 godina.

(2) Kazna zatvora izriče se na pune godine i mjesece, a do šest mjeseci i na pune dane.

(3) Kazna zatvora iz st. (1) i (2) ovog člana ne može se izreći maloljetnicima. Maloljetnicima se može izreći kazna maloljetničkog zatvora pod uslovima propisanim glavom X (PRAVILA O VASPITNIM PREPORUKAMA, VASPITNIM MJERAMA I O



KAŽNJAVANJU MALOLJETNIKA) ovog zakona. Kazna maloljetničkog zatvora po svojoj je svrsi, prirodi, trajanju i načinu izvršenja posebna kazna lišenja slobode.

## Član 51

### Granice ublažavanja kazne

(1) Kad postoje uvjeti za ublažavanje kazne iz člana 50. (Ublažavanje kazne) ovog zakona, sud će ublažiti kaznu u ovim granicama: a) ako je za krivično djelo kao najmanja mjera kazne propisana kazna zatvora od deset ili više godina, kazna se može ublažiti do pet godina zatvora; b) ako je za krivično djelo kao najmanja mjera kazne propisana kazna zatvora od tri ili više godina, kazna se može ublažiti do jedne godine zatvora; c) ako je za krivično djelo kao najmanja mjera kazne propisana kazna zatvora od dvije godine, kazna se može ublažiti do šest mjeseci zatvora; d) ako je za krivično djelo kao najmanja mjera kazne propisana kazna zatvora od jedne godine, kazna se može ublažiti do tri mjeseca zatvora; e) ako je za krivično djelo propisana kazna zatvora od najviše jedne godine, kazna se može ublažiti do trideset dana zatvora; f) ako je za krivično djelo propisana kazna zatvora bez naznake najmanje mjere, umjesto kazne zatvora može se izreći novčana kazna; g) ako je za krivično djelo propisana novčana kazna s naznakom najmanje mjere, kazna se može ublažiti do pet dnevnih iznosa, a ako se izriče u određenom iznosu do 500 KM.

(2) Pri odlučivanju koliko će kaznu ublažiti prema pravilima iz stava 1. ovog člana sud će posebno uzeti u obzir najmanju i najveću mjeru kazne propisane za to krivično djelo.

## Član 54

### Stjecaj krivičnih djela

(1) Ako je počinitelj jednom radnjom ili s više radnji počinio više krivičnih djela za koja mu se istovremeno sudi, sud će najprije utvrditi kazne za svako od tih krivičnih djela, pa će za sva krivična djela izreći jedinstvenu kaznu dugotrajnog zatvora, jedinstvenu kaznu zatvora ili jedinstvenu novčanu kaznu.

(2) Jedinstvenu kaznu sud će izreći po ovim pravilima: a) ako je za krivična djela u sticaju sud utvrdio kazne dugotrajnog zatvora ili dugotrajnog zatvora i zatvora, jedinstvena kazna dugotrajnog zatvora mora biti veća od svake pojedine utvrđene kazne, ali ne smije prijeći 45 godina; b) ako je za krivična djela u stjecaju sud utvrdio kazne zatvora, jedinstvena kazna zatvora mora biti veća od svake pojedine utvrđene kazne, ali ne smije dostignuti zbir utvrđenih kazni niti prijeći dvadeset godina; c) ako je za dva ili više krivičnih djela počinjenih u sticaju utvrdio kazne zatvora u trajanju dužem od deset godina, sud može izreći jedinstvenu kaznu dugotrajnog zatvora koja ne smije dosegnuti zbir pojedinačnih kazni zatvora; d) ako su za sva krivična djela u stjecaju propisane kazne zatvora do tri godine, jedinstvena kazna zatvora ne može biti veća od osam godina; e) ako je za krivična

djela u stjecaju sud utvrdio samo novčane kazne, jedinstvena kazna mora biti veća od svake pojedine utvrđene novčane kazne, ali ne smije dostignuti zbir utvrđenih novčanih kazni.

(3) Ako je za neka krivična djela u stjecaju sud utvrdio kazne zatvora, a za druga krivična djela u stjecaju novčane kazne, izreći će jedinstvenu kaznu zatvora i jedinstvenu novčanu kaznu po odredbama stava 2. tač. od b) do d) ovog člana.

(4) Sporednu kaznu sud će izreći ako je utvrđena makar za jedno krivično djelo u stjecaju, a ako je utvrdio više novčanih kazni izreći će jedinstvenu novčanu kaznu po odredbi stava 2. tačke d) ovog člana.

(5) Ako je sud za krivična djela u stjecaju utvrdio kazne zatvora i kazne maloljetničkog zatvora, izreći će jedinstvenu kaznu po odredbama stava 2. tač. b) i c) ovog člana.

## X - GLAVA DESETA PRAVILA O ODGOJNIM PREPORUKAMA, O ODGOJNIM MJERAMA I O KAŽNJAVANJU MALOLJETNIKA

### Član 79

#### Primjena posebnih krivičnih odredaba prema maloljetnicima

(1) Prema maloljetnim učiniteljima krivičnih djela primjenjuju se odredbe čl. od 79. do 109. ovog zakona, a ostale krivičnopravne odredbe iz drugih zakona primjenjuju se prema maloljetnicima samo ako ne izlaze iz okvira utvrđenih posebnim odredbama o maloljetnim učiniteljima krivičnih djela.

(2) Posebne odredbe o maloljetnim učiniteljima krivičnih djela primjenjuju se pod uvjetima propisanim odredbama čl. od 79. do 109. ovog zakona i prema punoljetnim osobama kad im se sudi za krivična djela koja su učinila kao maloljetnici, a izuzetno i prema osobama koje su učinile krivično djelo kao mlađi punoljetnici.

### Član 80

#### Uvjeti primjene odgojnih preporuka

(1) Prema maloljetnom učinitelju krivičnog djela mogu se primijeniti odgojne preporuke za krivična djela s propisanom novčanom kaznom ili kaznom zatvora do tri godine.

(2) Odgojne preporuke prema maloljetniku može primijeniti nadležni tužitelj ili sud za maloljetnike.

(3) Uvjeti su primjene odgojnih preporuka: maloljetnikovo priznanje krivičnog djela i njegova izražena spremnost za pomirenjem s oštećenim.

## Član 81

### Svrha odgojnih preporuka

Svrha je odgojnih preporuka: a) da se ne pokreće krivični postupak prema maloljetnom učinitelju krivičnog djela; b) i da se primjenom odgojnih preporuka utiče na maloljetnika da ubuduće ne učini krivična djela.

## Član 82

### Vrste odgojnih preporuka

(1) Odgojne preporuke jesu: a) osobno izvinjenje oštećenom; b) naknada štete oštećenom; c) redovito pohađanje škole; d) rad u korist humanitarne organizacije ili lokalne zajednice; e) prihvaćanje odgovarajućeg zaposlenja; f) smještaj u drugu obitelj, dom ili ustanovu; g) liječenje u odgovarajućoj zdravstvenoj ustanovi; h) posjećivanje odgojnih, obrazovnih, psiholoških i drugih savjetovališta.

(2) Odgojne preporuke iz stava 1. tač. od a) do c) i h) ovog člana primjenjuje ovlašteni tužitelj, a odgojne preporuke iz tač. od d) do g) primjenjuje sud za maloljetnike.

## Član 83

### Izbor odgojnih preporuka

(1) Pri izboru odgojnih preporuka ovlašteni tužitelj ili sud za maloljetnike uzet će u obzir sveukupne interese maloljetnika i oštećenika. Pritom će posebno voditi računa da se primijenjenim odgojnim preporukama ne dovede u pitanje maloljetnikovo redovito školovanje ili njegov rad.

(2) Odgojne preporuke mogu trajati najduže jednu godinu.

(3) Odgojne se preporuke mogu tokom njihovog izvršavanja zamijeniti drugom ili ukinuti.

(4) Izbor i primjena odgojnih preporuka izvršava se u saradnji s roditeljima ili starateljima maloljetnika i organima socijalnog staranja.

## Član 84

### Krivične sankcije prema maloljetnicima

(1) Maloljetnom se učinitelju krivičnog djela mogu izreći odgojne mjere i određene sigurnosne mjere, a starijem se maloljetniku izuzetno može izreći kazna maloljetničkog zatvora.

(2) Maloljetniku koji je u vrijeme učinjenja krivičnog djela navršio četrnaest, a nije navršio šesnaest godina života (mlađi maloljetnik), mogu se izreći samo odgojne mjere.

(3) Maloljetniku koji je u vrijeme učinjenja krivičnog djela navršio šesnaest, a nije navršio osamnaest godina života (stariji maloljetnik), odgojne se mjere mogu izreći pod uvjetima propisanim ovim zakonom, a izuzetno mu se može izreći kazna maloljetničkog zatvora.

(4) Maloljetniku se mogu izreći sigurnosne mjere pod uvjetima propisanim ovim zakonom.

(5) Maloljetniku se ne mogu izreći sudska opomena ni uvjetna osuda.

## **Član 85**

### **Svrhe odgojnih mjera i kazne maloljetničkog zatvora**

Svrha odgojnih mjera i kazne maloljetničkog zatvora je da se pružanjem zaštite i pomoći maloljetnim učiniteljima krivičnih djela, nadzorom nad njima, njihovim stručnim osposobljavanjem i razvijanjem njihove osobne odgovornosti osigura njihov odgoj, preodgoj i pravilan razvoj. Uz to, svrha je kazne maloljetničkog zatvora poseban uticaj na maloljetnog učinitelja da ubuduće ne učini krivična djela, te na druge maloljetnike da ne učine krivična djela.

## **Član 86**

### **Vrste odgojnih mjera**

(1) Odgojne mjere jesu: a) disciplinske mjere; b) mjere pojačanog nadzora; c) zavodske mjere.

(2) Disciplinske mjere izriču se maloljetnom učinitelju krivičnog djela kojem nije potrebno izreći trajnije mjere odgoja i preodgoja, naročito ako je učinio krivično djelo iz nepromišljenosti ili lakomislenosti.

(3) Mjere pojačanog nadzora izriču se maloljetnom učinitelju krivičnog djela kojem treba izreći trajnije mjere odgoja, preodgoja ili liječenja uz odgovarajući nadzor, a nije potrebno njegovo potpuno odvajanje iz dotadašnje sredine.

(4) Zavodske mjere izriču se maloljetnom učinitelju krivičnog djela kojem treba izreći trajnije mjere odgoja, preodgoja ili liječenja uz njegovo potpuno odvajanje iz dotadašnje sredine. Zavodske mjere ne mogu trajati duže od pet godina.

## **Član 87**

### **Odgojne mjere**

Maloljetnom učinitelju krivičnog djela mogu se izreći ove odgojne mjere: a) disciplinska mjera upućivanja u disciplinski centar za maloljetnike; b) mjere pojačanog nadzora: od

roditelja, usvojitelja ili staratelja; u drugoj obitelji; ili od nadležnog tijela socijalne zaštite;  
c) zavodske mjere: upućivanje u odgojnu ustanovu, u odgojno-popravni dom ili u drugu ustanovu za osposobljavanje.

## **Član 88**

### **Izbor odgojne mjere**

Pri izboru odgojne mjere sud će uzeti u obzir godine života maloljetnika, stepen njegovog duševnog razvoja, njegova psihička svojstva, njegove sklonosti, pobude iz kojih je djelo učinio, dotadašnji odgoj, sredinu i prilike u kojima je živio, težinu krivičnog djela, te je li mu ranije bila izrečena odgojna mjera ili kazna i sve druge okolnosti koje mogu biti od uticaja na izricanje odgojne mjere.

## **Član 89**

### **Upućivanje u disciplinski centar za maloljetnike**

(1) Sud će izreći odgojnu mjeru upućivanja u disciplinski centar za maloljetnike kad je potrebno da se odgovarajućim kratkotrajnim mjerama utiče na osobnost i ponašanje maloljetnog učitelja krivičnog djela.

(2) Maloljetnika kome je izrečena mjera iz stava 1. ovog člana sud može uputiti u disciplinski centar: a) na određeni broj sati tokom dana blagdana, ali najviše četiri uzastopna dana blagdana; b) na određeni broj sati tokom dana, ali najduže u trajanju do jednog mjeseca; c) na neprekidni boravak tokom određenog broja dana, ali ne duže od dvadeset dana.

(3) Pri izricanju mjere iz stava 1. ovog člana sud će voditi računa da zbog njenog izvršenja maloljetnik ne izostane s redovite školske nastave ili posla.

(4) U disciplinskom se centru maloljetnik može zaposliti na korisnim radovima koji odgovaraju njegovim godinama života, ukoliko on ili njegov staratelj na to pristanu.

(5) Pri izricanju odgojne mjere upućivanja u disciplinski centar za maloljetnike sud može izreći i odgojnu mjeru pojačanog nadzora nadležnog tijela socijalne zaštite koja se izvršava po izvršenju odgojne mjere upućivanja u disciplinski centar za maloljetnike.

## **Član 90**

### **Pojačan nadzor roditelja, usvojitelja ili staratelja**

(1) Odgojnu mjeru pojačanog nadzora roditelja, usvojitelja ili staratelja sud će izreći ako su roditelji, usvojitelj ili staratelj propustili nadzor nad maloljetnikom iako su u mogućnosti obavljati nadzor.

(2) Pri izricanju odgojne mjere iz stava 1. ovog člana sud može roditelju, usvojitelju ili staratelju dati potrebne upute i naložiti im određene dužnosti u pogledu mjera koje treba preduzeti radi odgoja maloljetnika, njegovog liječenja i radi otklanjanje štetnih uticaja.

(3) Pri izricanju odgojne mjere iz stava 1. ovog člana sud može odrediti da nadležni organ socijalnog staranja provjerava njeno izvršavanje i ukazuje pomoć roditelju, usvojitelju ili staratelju. Sud će naknadno odlučiti o prestanku takvog provjeravanja, s tim da ono ne može trajati manje od jedne ni duže od tri godine.

## **Član 91**

### **Pojačan nadzor u drugoj obitelji**

(1) Ako roditelji, usvojitelj ili staratelj nisu u mogućnosti da maloljetnika pojačano nadziru ili ako se od njih takav nadzor ne može opravdano očekivati, sud će maloljetniku izreći odgojnu mjeru pojačanog nadzora u drugoj obitelji koja je voljna primiti maloljetnika i koja ima mogućnosti da ga pojačano nadzire.

(2) Izvršenje odgojne mjere iz stava 1. ovog člana obustavit će se kad roditelji, usvojitelj ili staratelj steknu mogućnost da maloljetnika pojačano nadziru ili kad prema rezultatu odgoja prestane potreba za pojačanim nadzorom.

(3) Pri izricanju odgojne mjere iz stava 1. ovog člana sud će odrediti da za vrijeme njenog trajanja nadležni organ socijalne zaštite provjerava njeno izvršavanje i ukazuje potrebnu pomoć obitelji u kojoj je maloljetnik smješten.

## **Član 92**

### **Pojačan nadzor nadležnog organa socijalne zaštite**

(1) Ako roditelji, usvojitelj ili staratelj nisu u mogućnosti pojačano nadzirati maloljetnika, a ne postoje ni uvjeti za izricanje odgojne mjere pojačanog nadzora u drugoj obitelji, sud će maloljetniku izreći odgojnu mjeru pojačanog nadzora nadležnog organa socijalne zaštite.

(2) Sud će naknadno odlučiti o prestanku odgojne mjere iz stava 1. ovog člana s tim da njeno trajanje ne može biti kraće od jedne ni duže od tri godine. Za vrijeme trajanja ove mjere maloljetnik i dalje živi s roditeljima, usvojiteljem ili starateljem, a pojačani nadzor nad njim vrši ovlašćena osoba nadležnog organa socijalne zaštite.

(3) Ovlašćena osoba u nadležnom organu socijalne zaštite brine se o školovanju maloljetnika, njegovom zaposlenju, odvajanju iz sredine koja na njega štetno utiče, potrebnom liječenju i sređivanju prilika u kojima živi.

## **Član 93**

### **Posebne obaveze uz mjere pojačanog nadzora**

- (1) Pri izricanju neke od odgojnih mjera pojačanog nadzora iz člana 90. (Pojačan nadzor roditelja, usvojitelja ili staratelja), 91. (Pojačan nadzor u drugoj obitelji) i 92. (Pojačan nadzor nadležnog organa socijalne zaštite) ovog zakona, sud može maloljetniku odrediti jednu ili više posebnih obaveza, ako je to potrebno za uspješnije izvršenje izrečene mjere, s tim da te obaveze ne mogu trajati duže od trajanja odgojne mjere.
- (2) Sud može maloljetniku odrediti naročito ove obaveze: osobno izvinjenje oštećeniku, naknadu štete u okviru vlastitih mogućnosti, redovno pohađanje škole, osposobljavanje za zanimanje koje odgovara njegovim sposobnostima i sklonostima, uzdržavanje od uživanja alkoholnih pića i opojnih droga, posjećivanje odgovarajuće zdravstvene ustanove ili savjetovališta, te uzdržavanje od druženja s osobama koje na njega štetno djeluju.
- (3) Sud može obaveze koje je odredio naknadno ukinuti ili izmijeniti.
- (4) U slučaju neispunjenja obaveza iz stava 2. ovog člana sud može izrečenu mjeru pojačanog nadzora zamijeniti drugom odgojnom mjerom.
- (5) Pri određivanju obaveza iz stava 2. ovog člana sud će maloljetnika upozoriti na posljedice iz stava 4. ovog člana.

### **Član 94**

#### **Upućivanje u odgojnu ustanovu**

- (1) Sud će izreći odgojnu mjeru upućivanja u odgojnu ustanovu maloljetniku nad kojim treba osigurati izvršenje stalnog nadzora stručnih odgojitelja u ustanovi za odgoj maloljetnika.
- (2) U odgojnoj ustanovi maloljetnik ostaje najmanje šest mjeseci a najviše tri godine. Pri izricanju ove mjere sud neće odrediti njeno trajanje, već će o tome naknadno odlučiti (član 97. Obustava izvršenja i izmjena odluke o odgojnim mjerama, stav 2. ovog zakona).

### **Član 95**

#### **Upućivanje u odgojno-popravni dom**

- (1) Sud će izreći odgojnu mjeru upućivanja u odgojno-popravni dom za maloljetne učinitelje krivičnih djela maloljetniku prema kojem treba primijeniti pojačane mjere preodgoja.
- (2) Pri odlučivanju hoće li izreći odgojnu mjeru iz stava 1. ovog člana sud će posebno uzeti u obzir težinu i prirodu učinjenog krivičnog djela i okolnost jesu li maloljetniku ranije bile izrečene odgojne mjere ili kazna maloljetničkog zatvora.

(3) U odgojno-popravnim domu maloljetnik ostaje najmanje jednu a najviše pet godina. Pri izricanju odgojne mjere iz stava 1. ovog člana sud neće odrediti njeno trajanje, već će o tome naknadno odlučiti (član 97. Obustava izvršenja i izmjena odluke o odgojnim mjerama, stav 2. ovog zakona).

## Član 96

### Upućivanje u drugu ustanovu za osposobljavanje

(1) Maloljetniku ometenom u psihičkom ili fizičkom razvoju sud može umjesto odgojne mjere upućivanja u odgojnu ustanovu ili odgojne mjere upućivanja u odgojno-popravni dom izreći odgojnu mjeru upućivanja u drugu ustanovu za osposobljavanje.

(2) Maloljetnik ostaje u ustanovi za osposobljavanje dok je to potrebno radi njegovog liječenja ili osposobljavanja, a kad maloljetnik postane punoljetan, ponovo će se ispitati potreba njegova daljnjeg zadržavanja u toj ustanovi.

## Član 97

### Obustava izvršenja i izmjena odluke o odgojnim mjerama

(1) Kad se poslije donošenja odluke kojom je izrečena odgojna mjera pojačanog nadzora ili zavodska odgojna mjera pojave okolnosti kojih nije bilo u vrijeme donošenja odluke ili se za njih nije znalo, a one bi bile od uticaja na donošenje odluke, izvršenje izrečene mjere može se obustaviti ili se izrečena mjera može zamijeniti drugom odgojnom mjerom pojačanog nadzora ili zavodskom odgojnom mjerom.

(2) Uz slučajeve iz stava 1. ovog člana, ukoliko za pojedine mjere nije što drugo propisano, odgojna mjera pojačanog nadzora ili zavodska odgojna mjera može se, s obzirom na postignuti uspjeh odgoja, obustaviti od izvršenja, a može se i zamijeniti drugom takvom mjerom kojom će se bolje postići svrha odgojnih mjera.

(3) Obustavljanje od izvršenja zavodske odgojne mjere ili zamjenjivanje zavodske odgojne mjere drugom takvom mjerom izvršit će se uz sljedeća ograničenja: a) odgojna mjera upućivanja u odgojnu ustanovu ne može se obustaviti od izvršenja prije isteka roka od šest mjeseci, a do isteka ovog roka može se zamijeniti samo odgojnom mjerom upućivanja u odgojno-popravni dom ili odgojnom mjerom upućivanja u drugu ustanovu za osposobljavanje; b) odgojna mjera upućivanja u odgojno-popravni dom ne može se obustaviti od izvršenja prije isteka roka od jedne godine, a do isteka ovog roka može se zamijeniti samo odgojnom mjerom upućivanja u odgojnu ustanovu ili odgojnom mjerom upućivanja u drugu ustanovu za osposobljavanje.

(4) Izuzetno, odgojna mjera upućivanja u odgojnu ustanovu ili odgojna mjera upućivanja u odgojno-popravni dom može se obustaviti od izvršenja ili zamijeniti drugom mjerom i



prije isteka rokova iz stava 3. tač. a. i b. ovog člana ako posebne okolnosti koje se odnose na osobu maloljetnika očito pokazuju da je postignuta svrha tih mjera.

## **Član 98**

### **Ponovno odlučivanje o odgojnim mjerama**

(1) Ako je od pravosnažnosti odluke kojom je izrečena odgojna mjera pojačanog nadzora ili zavodska odgojna mjera proteklo više od jedne godine, a izvršenje nije započeto, sud će ponovno odlučiti o potrebi izvršenja izrečene mjere. Pri tome sud može odlučiti da se ranije izrečena mjera izvrši, ne izvrši ili da se zamijeni nekom drugom mjerom.

(2) Odgojna mjera upućivanja u disciplinski centar za maloljetnike neće se izvršiti ako je proteklo više od šest mjeseci od pravosnažnosti odluke kojom je ova mjera izrečena, a njeno izvršenje nije započeto.

## **Član 99**

### **Kažnjavanje starijih maloljetnika**

Kazniti se može samo stariji maloljetnik koji je učinio krivično djelo s propisanom kaznom zatvora težom od pet godina, a zbog teških posljedica djela i stepena krivice ne bi bilo opravdano izreći odgojnu mjeru.

## **Član 100**

### **Kazna maloljetničkog zatvora**

(1) Kazna maloljetničkog zatvora ne može biti kraća od jedne ni duža od deset godina, a izriče se na pune godine ili na pola godine.

(2) Pri odmjeravanju kazne starijem maloljetniku za krivično djelo sud ne može izreći kaznu maloljetničkog zatvora u trajanju dužem od kazne zatvora propisane za to krivično djelo, ali sud nije vezan za najmanju propisanu mjeru te kazne.

## **Član 101**

### **Odmjeravanje kazne maloljetničkog zatvora**

Pri odmjeravanju kazne maloljetničkog zatvora starijem maloljetniku sud će uzeti u obzir sve okolnosti koje utiču da kazna bude manja ili veća (član 49. Opća pravila za odmjeravanje kazne), imajući posebno u vidu stepen psihičkog razvoja maloljetnika i vrijeme potrebno za njegov preodgoj i stručno osposobljavanje.

## Član 102

### **Izricanje odgojnih mjera i kazne maloljetničkog zatvora za krivična djela u stjecađu**

(1) Za krivična djela u stjecađu sud izriče maloljetniku samo jednu odgojnu mjeru ili samo kaznu maloljetničkog zatvora kad postoje zakonski uvjeti za izricanje te kazne i kad sud ocijeni da je treba izreći.

(2) Po odredbi stava 1. ovog člana sud će postupiti i kad poslije izrečene odgojne mjere, ili kazne maloljetničkog zatvora utvrdi da je maloljetnik prije ili poslije njihovog izricanja učinio krivično djelo.

## Član 103

Zastarjelost izvršenja kazne maloljetničkog zatvora Kazna maloljetničkog zatvora neće se izvršiti kad od dana pravosnažnosti presude kojom je kazna izrečena protekne: a) deset godina ako je izrečena kazna maloljetničkog zatvora preko pet godina; b) pet godina ako je izrečena kazna maloljetničkog zatvora preko tri godine; c) tri godine ako je izrečena kazna maloljetničkog zatvora do tri godine.

## Član 104

### **Izricanje krivičnopravnih sankcija punoljetnim osobama za krivična djela koja su učinila kao maloljetnici**

(1) Punoljetnoj osobi koja je navršila dvadeset jednu godinu života ne može se suditi za krivično djelo koje je učinila kao mlađi maloljetnik.

(2) Ako punoljetna osoba u vrijeme suđenja nije navršila dvadeset jednu godinu života može joj se suditi samo za krivična djela s propisanom kaznom zatvora težom od pet godina. Takvoj osobi sud može izreći samo odgovarajuću zavodsku odgojnu mjeru, s tim da će pri ocjeni hoće li izreći ovu mjeru sud uzeti u obzir sve okolnosti slučaja, a naročito težinu učinjenog krivičnog djela, vrijeme koje je proteklo od njegovog učinjenja, ponašanje učinitelja i svrhu te odgojne mjere.

(3) Punoljetnoj osobi može se za krivično djelo koje je učinila kao stariji maloljetnik izreći odgovarajuća zavodska odgojna mjera, a pod uvjetima iz člana 100. (Kazna maloljetničkog zatvora) ovog zakona i kazna maloljetničkog zatvora. Pri ocjeni hoće li i koju će od ovih sankcija izreći, sud će uzeti u obzir sve okolnosti slučaja, a naročito težinu učinjenog krivičnog djela, vrijeme koje je proteklo od njegovog učinjenja, ponašanje učinitelja, te svrhu koju treba postići ovim sankcijama.

(4) Izuzetno od odredbe stava 3. ovog člana, punoljetnoj osobi koja je u vrijeme suđenja navršila dvadeset jednu godinu života sud može umjesto kazne maloljetničkog zatvora izreći kaznu zatvora ili uvjetnu osudu. Kazna zatvora izrečena u ovom slučaju ima u

pogledu. rehabilitacije, brisanja osude i pravnih posljedica osude isti pravni učinak kao i kazna maloljetničkog zatvora.

## **Član 105**

### **Izricanje odgojnih mjera mlađim punoljetnim osobama**

(1) Učinitelju koji je kao punoljetan učinio krivično djelo, a u vrijeme suđenja nije navršio dvadeset jednu godinu života, sud može izreći odgovarajuću zavodsku odgojnu mjeru ako se, s obzirom na njegovu ličnost i okolnosti pod kojima je krivično djelo učinio, može očekivati da će se i odgojnom mjerom postići svrha koja bi se ostvarila izricanjem kazne.

(2) Mlađoj punoljetnoj osobi kojoj je izrečena odgojna mjera sud može, pod uvjetima propisanim ovim zakonom, izreći sve sigurnosne mjere propisane ovim zakonom, osim sigurnosne mjere zabrane vršenja poziva, aktivnosti ili funkcije.

(3) Izrečena odgojna mjera može trajati najduže dok učinitelj ne navrši dvadeset tri godine života.

## **Član 106 Izricanje sigurnosnih mjera maloljetniku**

(1) Maloljetnom učinitelju krivičnog djela kojem je izrečena odgojna mjera ili kazna maloljetničkog zatvora mogu se, pod uvjetima propisanim zakonom, izreći sigurnosne mjere iz člana 71. (Vrste sigurnosnih mjera) tač. a), b) i e) ovog zakona.

(2) Sigurnosna mjera obaveznog liječenja od ovisnosti ne može se izreći uz disciplinsku mjeru.

(3) Umjesto sigurnosne mjere obaveznog psihijatrijskog liječenja može se izreći odgojna mjera upućivanja u drugu ustanovu za osposobljavanje ako se u toj ustanovi može osigurati liječenje i time postići svrha te sigurnosne mjere. Pored toga, može se izreći i sigurnosna mjera oduzimanja predmeta.

## **Član 107**

### **Učinak kazne na odgojne mjere**

(1) Ako za vrijeme trajanja odgojne mjere sud izrekne starijem maloljetniku kaznu maloljetničkog zatvora, odgojna mjera prestaje kad maloljetnik započne izdržavanje te kazne.

(2) Ako za vrijeme trajanja odgojne mjere sud izrekne punoljetnoj osobi kaznu maloljetničkog zatvora ili kaznu zatvora najmanje godinu dana, odgojna mjera prestaje kad ta osoba započne izdržavanje kazne.

(3) Ako za vrijeme trajanja odgojne mjere sud izrekne punoljetnoj osobi kaznu zatvora u trajanju kraćem od jedne godine, sud će u presudi odlučiti hoće li se po izdržanoj kazni nastaviti izvršenje izrečene odgojne mjere ili će se ta mjera ukinuti.

## **Član 108**

### **Učinak odgojnih mjera i kazne maloljetničkog zatvora**

(1) Odgojne mjere i kazna maloljetničkog zatvora ne posljeduju pravnim posljedicama osude koje se sastoje u zabrani sticanja određenih prava iz člana 118. (Vrste pravnih posljedica osude) stav 2. ovog zakona.

(2) Na osobe koje izdržavaju odgojnu mjeru upućivanja u odgojno-popravni dom ili kaznu maloljetničkog zatvora primjenjuju se odredbe člana 112. (Rad osuđenih osoba) ovog zakona.

## **Član 109**

### **Evidencija o izrečenim odgojnim mjerama**

(1) Evidenciju o izrečenim odgojnim mjerama vode nadležni organi socijalne zaštite na osnovu propisa koje donosi organ nadležan za poslove socijalne zaštite u Federaciji.

(2) Podaci o izrečenim odgojnim mjerama mogu se dati samo sudu, tužiteljstvu, organima unutrašnjih poslova i organima socijalne zaštite u vezi sa krivičnim postupkom koji se vodi protiv osoba kojima su izrečene odgojne mjere.

## **Član 110**

### **Izvršenje kazne zatvora**

(1) Kazna zatvora i kazna maloljetničkog zatvora izvršavaju se u zatvorenim, poluotvorenim ili otvorenim ustanovama za izdržavanje kazne.

(2) Kazna dugotrajnog zatvora izvršava se u zatvorenim ustanovama za izdržavanje kazne.

(3) Izuzetno od odredbe stava (2) ovog člana, kazna dugotrajnog zatvora može se izvršavati i u ustanovama poluotvorenog tipa pod uvjetom da je osuđena osoba izdržala dvije trećine kazne dugotrajnog zatvora i pod uvjetom da uredno koristi vanzavodske pogodnosti.

(4) Na postupak premještaja osuđene osobe iz stava (3) ovog člana shodno se primjenjuju odredbe o premještaju osuđenih osoba propisanih odredbama Zakona o izvršenju krivičnih sankcija u Federaciji Bosne i Hercegovine.

(5) Kućni zatvor sa elektronskim nadzorom izvršava se u prostorijama u kojima osuđena osoba stanuje u mjestu prebivališta, odnosno boravišta.

## **Član 112**

### **Rad osuđenih osoba**

(1) Osoba osuđena na kaznu zatvora, kaznu dugotrajnog zatvora ili kaznu maloljetničkog zatvora, koja je sposobna za rad, može raditi ukoliko ona na to pristane.

(2) Ako osuđena osoba traži ili pristane na rad, rad će joj se omogućiti.

(3) Rad osuđene osobe treba biti koristan i usklađen sa savremenim načinom vršenja iste vrste rada na slobodi, prema stručnim i drugim sposobnostima osuđenog.

## **Član 113**

### **Izvršenje kazne maloljetničkog zatvora**

(1) Prema starijem maloljetniku, dok ne navrší osamnaest godina života, kazna maloljetničkog zatvora izvršava se u posebnim kazneno-popravnim ustanovama za maloljetnike. Prema osobi koja je navršila osamnaest godina života, ali nije navršila dvadeset tri godine života (mlađa punoljetna osoba) kazna maloljetničkog zatvora se izvršava u posebnim ustanovama za mlađe punoljetne osobe ili u posebnom odjeljenju ustanove u kojoj se kazna izvršava prema punoljetnim osobama, pri čemu se osigurava da mlađe punoljetne osobe ne dođu u kontakt sa starijim zatvorenicima. Prema osobi koja je navršila dvadeset tri godine života prije kraja izdržavanja kazne ostatak kazne se izvršava u kazneno-popravnoj ustanovi za odrasle.

(2) Prema mlađoj punoljetnoj osobi kazna se može izvršavati u kazneno-popravnoj ustanovi za maloljetnike sve dok je to potrebno radi završetka njenog školovanja ili stručnog osposobljavanja. Međutim, prema mlađoj se punoljetnoj osobi kazna ne može ni u kojem slučaju izvršavati u kazneno-popravnoj ustanovi za maloljetnike, ako bi to bilo na koji način bilo štetno za maloljetne osobe prema kojima se izvršava kazna maloljetničkog zatvora u toj ustanovi.

(3) Izbor posla za osuđenog maloljetnika vrši se prema njegovim sposobnostima i sklonostima za određenu vrstu posla, radi stručnog osposobljavanja, a prema mogućnostima koje postoje u kazneno-popravnoj ustanovi za maloljetnike. Mlađoj punoljetnoj osobi će se također omogućiti obrazovanje i stručno osposobljavanje, bez obzira na to izvršava li se kazna u posebnim ustanovama ili u posebnim odjeljenjima kazneno-popravnih ustanova za odrasle osobe.

(4) Radno vrijeme osuđenog maloljetnika određuje se tako da mu se omogući školovanje i stručno osposobljavanje i da mu ostane dovoljno vremena za fizički odgoj i razonodu.

(5) Osuđeni maloljetnik može biti uvjetno otpušten s izdržavanja kazne ako je izdržao trećinu kazne, ali ne prije nego što je proveo jednu godinu u kazneno-popravnoj ustanovi. Za vrijeme uvjetnog otpusta sud može odrediti odgojnu mjeru pojačanog nadzora nadležnog tijela socijalne zaštite. Za opoziv uvjetnog otpusta primjenjuju se odredbe člana 46. (Opoziv uvjetnog otpusta) ovog zakona.

## **Član 121**

### **Rehabilitacija**

(1) Poslije izdržane, oprostene ili zastarjele kazne zatvora, kazne dugotrajnog zatvora ili kazne maloljetničkog zatvora, osuđene osobe uživaju sva prava utvrđena ustavom, zakonom i drugim propisima i mogu sticati sva prava, osim onih koja su im ograničena sigurnosnom mjerom ili nastupanjem pravne posljedice osude.

(2) Odredba stava 1. ovog člana primjenjuje se i na osobe na uvjetnom otpustu ako njihova prava nisu ograničena posebnim propisima o uvjetnom otpustu s izdržavanja kazne zatvora.

## **Član 125**

### **Brisanje osude**

(1) Pod uslovom da počinitelj krivičnog djela nije ponovo osuđen za novo krivično djelo, osuda se briše po sili zakona kada proteknu sljedeći rokovi: a) osuda kojom je počinitelj oslobođen kazne briše se iz kaznene evidencije ako osuđenik u roku od jedne godine od dana pravosnažnosti presude ne počini novo krivično djelo, b) uslovna osuda briše se iz kaznene evidencije po proteku roka od jedne godine od dana prestanka vremena provjeravanja, ako za to vrijeme osuđenik ne počini novo krivično djelo, c) osuda na novčanu kaznu i na kaznu zatvora u trajanju do jedne godine briše se iz kaznene evidencije po proteku roka od tri godine od dana izvršenja, zastare ili oprosta kazne, ako za to vrijeme osuđenik ne počini novo krivično djelo, d) osuda na kaznu zatvora u trajanju preko jedne do tri godine briše se iz kaznene evidencije po proteku roka od pet godina od dana izvršenja, zastare ili oprosta kazne, ako za to vrijeme osuđenik ne počini novo krivično djelo, e) osuda na kaznu zatvora u trajanju preko tri do pet godina briše se iz kaznene evidencije po proteku roka od deset godina od dana izvršenja, zastare ili oprosta kazne, ako za to vrijeme osuđenik ne počini novo krivično djelo, f) osuda na kaznu zatvora u trajanju preko pet do deset godina briše se iz kaznene evidencije po proteku roka od 15 godina od dana izvršenja, zastare ili oprosta kazne, ako za to vrijeme osuđenik ne počini novo krivično djelo.

(2) Sud može, na molbu osuđenika, odrediti da se iz kaznene evidencije briše osuda na kaznu zatvora u trajanju preko deset godina ako je protekao rok od 20 godina od dana

izdržavanja, zastare ili oprosta kazne, a u tom vremenu osuđenik nije počinio novo krivično djelo.

(3) Prilikom odlučivanja o brisanju osude iz stava (2) ovog člana, sud će voditi računa o vladanju osuđenika poslije izdržavanja kazne, o prirodi krivičnog djela i o drugim okolnostima koje mogu biti od značaja za ocjenu opravdanosti brisanja osude.

(4) Osuda na kaznu dugotrajnog zatvora se ne briše. (5) Osuda se ne može brisati iz kaznene evidencije dok traje krivični postupak za novo krivično djelo. (6) Osuda se ne može brisati iz kaznene evidencije dok traje primjena mjera sigurnosti niti dok oduzimanje imovinske koristi pribavljene krivičnim djelom nije potpuno izvršeno. (7) Brisanjem osude iz kaznene evidencije pod uslovima iz st. (1) do (3) ovog člana počinitelj krivičnog djela smatra se neosuđivanim.

## **Član 166**

### **Ubistvo**

(1) Ko drugoga usmrti, kaznit će se kaznom zatvora najmanje pet godina.

(2) Kaznom zatvora najmanje deset godina ili kaznom dugotrajnog zatvora kaznit će se:  
a) ko drugog usmrti na okrutan ili podmukao način; b) ko drugog usmrti pri bezobzirnom nasilničkom ponašanju; c) ko drugog usmrti iz mržnje; d) ko drugog usmrti iz koristoljublja, radi učinjenja ili prikrivanja kog drugog krivičnog djela, iz bezobzirne osvete ili iz drugih niskih pobuda; e) ko usmrti sudiju ili tužioca u vezi sa vršenjem njihove sudijske ili tužilačke dužnosti, službenu ili vojnu osobu pri obavljanju poslova sigurnosti ili dužnosti čuvanja javnog reda, hapšenja učinitelja krivičnog djela ili čuvanja osobe kojoj je oduzeta sloboda.

## **Član 170**

### **Učestvovanje u samoubistvu**

(1) Ko navede drugog na samoubistvo ili mu pomogne u samoubistvu, pa ono bude učinjeno, kaznit će se kaznom zatvora od tri mjeseca do pet godina.

(2) Ko djelo iz stava 1. ovog člana učini prema maloljetniku ili prema osobi čija je sposobnost shvaćanja značenja svog djela ili upravljanja svojim postupcima bitno smanjena, kaznit će se kaznom zatvora od jedne do deset godina.

(3) Ko djelo iz stava 1. ovog člana učini prema djetetu ili prema osobi koja nije mogla shvatiti značaj svog djela ili upravljati svojim postupcima, kaznit će se po članu 166. (Ubistvo) stav 1. ovog zakona.

(4) Ko okrutno ili nečovječno postupa s osobom koja se prema njemu nalazi u odnosu kakve podređenosti ili zavisnosti i time iz nehata izazove samoubistvo te osobe, kaznit će se kaznom zatvora od šest mjeseci do pet godina.

## Član 171

### Protupravni prekid trudnoće

(1) Ko protivno propisima o prekidu trudnoće trudnoj ženi s njezinim pristankom započne činiti, učini ili joj pomogne učiniti prekid trudnoće, kaznit će se kaznom zatvora od tri mjeseca do tri godine.

(2) Ko trudnoj ženi bez njezina pristanka započne činiti ili učini prekid trudnoće, kaznit će se kaznom zatvora od jedne do osam godina.

(3) Ako je krivičnim djelom iz stava 1. ovog člana trudna žena teško tjelesno ozljeđena, ili joj je zdravlje teško narušeno ili je prouzrokovana smrt trudne žene, učinitelj će se kazniti kaznom zatvora od šest mjeseci do pet godina.

(4) Ako je krivičnim djelom iz stava 2. ovog člana trudna žena teško tjelesno ozljeđena, ili joj je zdravlje teško narušeno ili je prouzrokovana smrt trudne žene, učinitelj će se kazniti kaznom zatvora najmanje jednu godinu.

## Član 172

### Teška tjelesna ozljeda

(1) Ko drugoga teško tjelesno ozlijedi ili mu zdravlje teško naruši, kaznit će se kaznom zatvora od šest mjeseci do pet godina.

(2) Ko krivično djelo iz stava 1. ovog člana učini prema bračnom partneru ili osobi s kojom živi u izvanbračnoj zajednici ili roditelju svog djeteta s kojim ne živi u zajednici, kaznit će se kaznom zatvora od jedne do pet godina.

(3) Ko drugoga tjelesno ozlijedi ili mu zdravlje naruši tako teško da je zbog toga doveden u opasnost život ozljeđenog ili je uništen ili trajno i u znatnoj mjeri oslabljen koji važan dio njegova tijela ili koji važan organ, ili je prouzrokovana trajna nesposobnost za rad ozljeđenog ili trajno i teško narušenje njegova zdravlja ili unakaženost, kaznit će se kaznom zatvora od jedne do deset godina.

(4) Kaznom iz stava 3. ovog člana kaznit će se ko krivično djelo iz stava 1. ovog člana učini iz mržnje.

(5) Ako ozljeđeni umre zbog ozljede iz st. 1. do 4. ovog člana, učinitelj će se kazniti kaznom zatvora od jedne do dvanaest godina.



(6) Ko krivično djelo iz st. od 1. do 3. ovog člana učini iz nehata, kaznit će se kaznom zatvora do tri godine.

(7) Ko krivično djelo iz st. od 1. do 3. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozljeđenog, kaznit će se kaznom zatvora od tri mjeseca do tri godine.

(8) Ko krivično djelo iz stava 4. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozljeđenog, kaznit će se kaznom zatvora od šest mjeseci do pet godina.

### **Član 173**

#### **Lahka tjelesna ozljeda**

(1) Ko drugog lahko tjelesno ozlijedi ili mu zdravlje lahko naruši, kaznit će se novčanom kaznom ili kaznom zatvora do jedne godine.

(2) Ko krivično djelo iz stava 1. ovog člana učini prema bračnom partneru ili osobi s kojom živi u izvanbračnoj zajednici ili roditelju svog djeteta s kojime ne živi u zajednici, kaznit će se kaznom zatvora do jedne godine.

(3) Sud može učinitelju krivičnog djela iz stava 1. ovog člana izreći sudsku opomenu ako je učinitelj bio izazvan nepristojnim ili grubim ponašanjem oštećenog.

### **Član 180**

#### **Otmica**

(1) Ko drugog protupravno zatvori, drži zatvorena ili mu na drugi način oduzme ili ograniči slobodu kretanja s ciljem da njega ili koga drugog prisili da što učini, ne učini ili trpi, kaznit će se kaznom zatvora od šest mjeseci do pet godina.

(2) Ko krivično djelo iz stava 1. ovog člana učini prema djetetu ili maloljetniku, ili ko radi ostvarivanja cilja otmice iz stava 1. ovog člana prijeti da će taoca usmrtiti ili teško tjelesno ozlijediti, ili ako je krivično djelo učinjeno u sastavu grupe ljudi ili organizirane grupe ljudi, učinitelj će se kazniti kaznom zatvora od jedne do deset godina.

(3) Učinitelj krivičnog djela iz st. 1. i 2. ovog člana koji dobrovoljno pusti na slobodu taoca prije nego je ostvaren njegov zahtjev radi kog je učinio otmicu, može se osloboditi kazne.

### **Član 183**

## **Ugrožavanje sigurnosti**

(1) Ko ugrozi sigurnost neke osobe ozbiljnom prijetnjom da će napasti na život ili tijelo te osobe ili na taj način izazove uznemirenje građana, kaznit će se kaznom zatvora do šest mjeseci.

(2) Ko ugrozi sigurnost više osoba ozbiljnom prijetnjom da će napasti na život ili organ tih osoba ili taj način izazove uznemirenje građana, kaznit će se kaznom zatvora od tri mjeseca do pet godina.

(3) Ko prikradanjem, učestalim praćenjem ili uznemiravanjem na drugi način ugrožava sigurnost bračnog partnera, osobe s kojom živi u izvanbračnoj zajednici, roditelja svog djeteta ili druge osobe s kojom održava ili je održavao bliske veze, kaznit će se novčanom kaznom ili kaznom zatvora do jedne godine.

## **Član 189**

### **Neovlašćeno optičko snimanje**

(1) Ko fotografski, filmski ili na drugi način snimi drugu osobu bez njezinog pristanka u njezinim prostorijama ili ko takav snimak direktno prenese trećem ili ko mu takav snimak pokaže ili mu na koji drugi način omogući da se s njim direktno upozna, kaznit će se novčanom kaznom ili kaznom zatvora do tri godine.

(2) Službena osoba koja učini krivično djelo iz stava 1. ovog člana u vršenju službe, kaznit će se kaznom zatvora od šest mjeseci do pet godina.

(3) Ko dijete ili maloljetnika snimi radi izrade fotografija, audiovizualnog materijala ili drugih predmeta pornografskog sadržaja, ili posjeduje ili uvozi ili prodaje ili rasparčava ili prikazuje takav materijal, kaznit će se kaznom zatvora od jedne do pet godina.

(4) Predmeti koji su bili namijenjeni ili upotrijebljeni za učinjenje krivičnog djela iz st. 1. i 3. ovog člana oduzet će se, a predmeti koji su učinjenjem krivičnog djela iz st. 1. i 3. ovog člana nastali oduzet će se i uništiti.

## **Član 203**

### **Silovanje**

(1) Ko drugu osobu upotrebom sile ili prijetnje da će izravno napasti na njezin život ili tijelo ili na život ili tijelo njoj bliske osobe prisili na spolni odnošaj ili s njim izjednačenu spolnu radnju, kaznit će se kaznom zatvora od jedne do deset godina.

(2) Ko krivično djelo iz stava 1. ovog člana učini na naročito okrutan ili naročito ponižavajući način, ili ako je istom prilikom prema istoj žrtvi učinjeno više spolnih odnošaja

ili s njim izjednačenih spolnih radnji od više učinitelja, kaznit će se kaznom zatvora od tri do petnaest godina.

(3) Ako je krivičnim djelom iz stava 1. ovog člana prouzrokovana smrt silovane osobe, ili je ona teško tjelesno ozlijeđena, ili joj je teško narušeno zdravlje, ili je silovana ženska osoba ostala trudna, učinitelj će se kazniti kaznom zatvora najmanje tri godine.

(4) Kaznom iz stava 2. ovog člana kaznit će se ko učini krivično djelo iz stava 1. ovog člana zbog mržnje prema žrtvi.

(5) Ko krivično djelo iz stava 1. ovog člana učini prema maloljetniku, kaznit će se kaznom zatvora najmanje tri godine.

(6) Ko krivično djelo iz st. 2., 3. i 4. ovog člana učini prema maloljetniku, kaznit će se kaznom zatvora najmanje pet godina.

(7) Ako su krivičnim djelom iz stava 2. ovog člana prouzrokovane posljedice iz stava 3. ovog člana, učinitelj će se kazniti kaznom zatvora najmanje pet godina.

## Član 204

### Spolni odnošaj s nemoćnom osobom

(1) Ko izvrši spolni odnošaj ili s njim izjednačenu spolnu radnju s drugom osobom iskoristivši njezinu duševnu bolest, duševnu poremećenost, nedovoljnu duševnu razvijenost, neku drugu težu duševnu smetnju, ili kakvo drugo stanje te osobe zbog kojeg ona nije sposobna za otpor, kaznit će se kaznom zatvora od jedne do osam godina.

(2) Ko krivično djelo iz stava 1. ovog člana učini prema osobi čije je stanje nesposobnosti za otpor sam izazvao ili je u tome učestvovao, kaznit će se po članu 203. (Silovanje) stav 1. ovog zakona.

(3) Ko krivično djelo iz stava 1. ovog člana učini na naročito okrutan ili naročito ponižavajući način, ili ako je istom prigodom prema istoj žrtvi učinjeno više spolnih odnošaja, ili s njim izjednačenih spolnih radnji od više učinitelja, kaznit će se kaznom zatvora od jedne do deset godina.

(4) Ko krivično djelo iz stava 2. ovog člana učini na naročito okrutan ili naročito ponižavajući način, ili ako je istom prigodom prema istoj žrtvi učinjeno više spolnih odnošaja, ili s njim izjednačenih spolnih radnji od više učinitelja, kaznit će se po članu 203. stav 2. ovog zakona.

(5) Ako je krivičnim djelom iz stava 1. ovog člana prouzrokovana smrt osobe s kojom je izvršen spolni odnošaj ili s njim izjednačena spolna radnja, ili je ona teško tjelesno ozlijeđena, ili joj je zdravlje teško narušeno, ili ako je ženska osoba ostala trudna, učinitelj će se kazniti kaznom zatvora od jedne do deset godina. (6) Ako su krivičnim djelom iz st.

3. i 4. ovog člana prouzrokovane posljedice iz stava 5. ovog člana, učinitelj će se kazniti kaznom zatvora najmanje tri godine.

## **Član 205**

### **Spolni odnošaj zloupotrebom položaja**

(1) Ko zloupotrebom svog položaja navede na spolni odnošaj ili s njim izjednačenu spolnu radnju drugu osobu koja se zbog imovinskog, obiteljskog, društvenog, zdravstvenog ili drugog stanja ili teških prilika nalazi prema njemu u odnosu zavisnosti, kaznit će se kaznom zatvora od tri mjeseca do tri godine.

(2) Nastavnik, odgojitelj, roditelj, usvojitelj, staratelj, očuh, maćeha ili druga osoba koja iskorištavajući svoj položaj ili odnos prema maloljetniku koji joj je povjeren radi učenja, odgoja, čuvanja ili njege izvrši s njim spolni odnošaj ili s njim izjednačenu spolnu radnju, kaznit će se kaznom zatvora od šest mjeseci do pet godina.

## **Član 206**

### **Prinuda na spolni odnošaj**

Ko drugu osobu prisili na spolni odnošaj ili s njim izjednačenu spolnu radnju ozbiljnom prijetnjom nekim teškim zlom, kaznit će se kaznom zatvora od šest mjeseci do pet godina.

## **Član 207**

### **Spolni odnošaj s djetetom**

(1) Ko izvrši spolni odnošaj ili s njim izjednačenu spolnu radnju s djetetom, kaznit će se kaznom zatvora od jedne do osam godina.

(2) Ko izvrši nasilni spolni odnošaj ili s njim izjednačenu spolnu radnju s djetetom (član 203. Silovanje, stav 1.) ili s nemoćnim djetetom (član 204. Spolni odnošaj s nemoćnom osobom, stav 1.), kaznit će se kaznom zatvora najmanje tri godine.

(3) Ko izvrši spolni odnošaj ili s njim izjednačenu spolnu radnju s djetetom zloupotrebom položaja (član 205. Spolni odnošaj zloupotrebom položaja, stav 2.), kaznit će se kaznom zatvora od jedne do deset godina.

(4) Ko krivično djelo iz st. od 1. do 3. ovog člana učini na naročito okrutan ili naročito ponižavajući način, ili ako je istom prigodom prema istoj žrtvi učinjeno više spolnih odnošaja ili s njim izjednačenih spolnih radnji od više učinitelja, kaznit će se kaznom zatvora najmanje pet godina.

(5) Ako je krivičnim djelom iz st. od 1. do 3. ovog člana prouzrokovana smrt djeteta, ili je dijete teško tjelesno ozlijeđeno, ili mu je zdravlje teško narušeno, ili je žensko dijete ostalo trudno, učinitelj će se kazniti kaznom zatvora najmanje pet godina ili kaznom dugotrajnog zatvora.

## **Član 208**

### **Bludne radnje**

(1) Ko u slučajevima iz čl. 203. (Silovanje), 204. (Spolni odnošaj s nemoćnom osobom), 205. (Spolni odnošaj zloupotrebom položaja) i 206. (Prinuda na spolni odnošaj) ovog zakona, kada nije počinjen ni pokušaj tog krivičnog djela, učini samo bludnu radnju, kaznit će se kaznom zatvora od tri mjeseca do tri godine.

(2) Ko u slučaju iz člana 207. (Spolni odnošaj s djetetom) ovog zakona, kada nije počinjen ni pokušaj tog krivičnog djela, učini samo bludnu radnju, ili ko krivično djelo iz stava 1. ovog člana učini prema djetetu ili maloljetniku, kaznit će se kaznom zatvora od šest mjeseci do pet godina.

## **Član 209**

### **Zadovoljenje pohote pred djetetom ili maloljetnikom**

Ko pred djetetom ili maloljetnikom čini radnje namijenjene zadovoljavanju vlastite ili tuđe pohote, ili ko navede dijete da pred njim ili drugom osobom vrši takve radnje, kaznit će se kaznom zatvora od tri mjeseca do tri godine.

## **Član 211**

### **Iskorišćavanje djeteta ili maloljetnika radi pornografije**

(1) Ko dijete ili maloljetnika snimi radi izradbe fotografija, audiovizuelnog materijala ili drugih predmeta pornografskog sadržaja, ili posjeduje ili uvozi ili prodaje ili raspačava ili prikazuje takav materijal, ili te osobe navede na učestvovanje u pornografskoj predstavi, kaznit će se kaznom zatvora od jedne do pet godina.

(2) Predmeti koji su bili namijenjeni ili upotrijebljeni za učinjenje krivičnog djela iz stava 1. ovog člana oduzet će se, a predmeti koji su nastali učinjenjem krivičnog djela iz stava 1. ovog člana oduzet će se i uništiti.

## **Član 212**

### **Upoznavanje djeteta s pornografijom**

(1) Ko djetetu proda, prikaže ili javnim izlaganjem ili na drugi način učini pristupačnim spise, slike, audiovizuelne i druge predmete pornografskog sadržaja ili mu prikaže pornografsku predstavu, kaznit će se novčanom kaznom ili kaznom zatvora do jedne godine.

(2) Predmeti iz stava 1. ovog člana oduzet će se.

### **Član 213**

#### **Rodoskrvnuće**

(1) Ko izvrši spolni odnošaj ili s njim izjednačenu spolnu radnju s krvnim rođakom u ravnoj liniji ili s bratom ili sestrom, kaznit će se novčanom kaznom ili kaznom zatvora od šest mjeseci do dvije godine.

(2) Ko krivično djelo iz stava 1. ovog člana učini s maloljetnikom, kaznit će se kaznom zatvora od jedne do pet godina.

(3) Ko djelo iz stava 1. ovog člana učini s djetetom, kaznit će se kaznom zatvora od dvije do deset godina.

### **Član 216**

#### **Izvanbračna zajednica s mlađim maloljetnikom**

(1) Punoljetna osoba koja izvanbračno živi s maloljetnikom koji nije navršio šesnaest godina života, kaznit će se kaznom zatvora od tri mjeseca do tri godine.

(2) Kaznom iz stava 1. ovog člana kaznit će se roditelj, usvojitelj ili staratelj koji maloljetniku u životnoj dobi između četrnaest i šesnaest godina života omogući izvanbračni život s drugom osobom ili ga na to navede.

(3) Ko krivično djelo iz stava 2. ovog člana učini iz koristoljublja, kaznit će se kaznom zatvora od šest mjeseci do pet godina. (4) Ako se sklopi brak, krivično gonjenje neće se poduzeti, a ako je poduzeto, obustavit će se.

### **Član 217**

#### **Oduzimanje djeteta ili maloljetnika**

(1) Ko dijete ili maloljetnika protupravno oduzme roditelju, usvojitelju, staratelju ili osobi kojoj je povjeren, ili ko ga protupravno zadržava ili sprečava da bude s osobom koja ima

to pravo ili ko onemogućava izvršenje izvršne odluke o staranju prema djetetu ili maloljetniku, kaznit će se kaznom zatvora do tri godine.

(2) Ako je krivičnim djelom iz stava 1. ovog člana dijete ili maloljetnik napustio teritoriju Federacije ili teritoriju Bosne i Hercegovine, učinitelj će se kazniti kaznom zatvora od tri mjeseca do pet godina.

(3) Učinitelj koji dobrovoljno preda dijete ili maloljetnika, može se osloboditi kazne.

## **Član 218**

### **Promjena porodičnog stanja**

Ko podmetanjem, zamjenom ili na drugi način promijeni porodično stanje djeteta, kaznit će se kaznom zatvora od tri mjeseca do tri godine.

## **Član 219**

### **Zapuštanje ili zlostavljanje djeteta ili maloljetnika**

(1) Roditelj, usvojitelj, staratelj ili druga osoba koja grubo zanemaruje svoje funkcije zbrinjavanja ili odgoja djeteta ili maloljetnika, kaznit će se kaznom zatvora od tri mjeseca do tri godine.

(2) Kaznom iz stava 1. ovog člana kaznit će se roditelj, usvojitelj, staratelj ili druga osoba koja zlostavi dijete ili maloljetnika, prisili ga na rad koji ne odgovara njegovoj životnoj dobi, ili na pretjerani rad, ili na prosjačenje, ili ga iz koristoljublja navodi na ponašanje koje je štetno za njegov razvoj.

(3) Ako je krivičnim djelom iz st. 1. i 2. ovog člana dijete ili maloljetnik teško tjelesno ozlijeđen, ili mu je teško narušeno zdravlje, ili se zbog krivičnog djela iz st. 1. ili 2. ovog člana dijete ili maloljetnik odao prosjačenju, prostituciji ili drugim oblicima asocijalnog ponašanja ili delikvenciji, učinitelj će se kazniti kaznom zatvora od tri mjeseca do pet godina.

## **Član 220**

### **Napuštanje djeteta**

Ko napusti svoje nemoćno dijete s ciljem da ga se trajno riješi, kaznit će se kaznom zatvora od šest mjeseci do tri godine.

## **Član 222**

## **Nasilje u porodici**

- (1) Ko nasiljem, drskim ili bezobzirnim ponašanjem ugrožava mir, tjelesnu cjelovitost ili psihičko zdravlje člana svoje porodice, kaznit će se novčanom kaznom ili kaznom zatvora do jedne godine.
- (2) Ko krivično djelo iz stava 1. ovog člana učini prema članu porodice s kojim živi u zajedničkom kućanstvu, kaznit će se novčanom kaznom ili kaznom zatvora do tri godine.
- (3) Ako je pri učinjenju krivičnog djela iz st. 1. i 2. ovog člana upotrijebljeno oružje, opasno oruđe ili drugo sredstvo prikladno teško ozlijediti tijelo ili narušiti zdravlje, učinitelj će se kazniti kaznom zatvora od tri mjeseca do tri godine.
- (4) Ako je krivičnim djelom iz st. od 1. do 3. ovog člana član porodice teško tjelesno ozlijeđen ili mu je zdravlje teško narušeno, ili ako je krivično djelo iz st. od 1. do 3. ovog člana učinjeno prema djetetu ili maloljetniku, učinitelj će se kazniti kaznom zatvora od jedne do pet godina.
- (5) Ako je krivičnim djelom iz st. od 1. do 4. ovog člana prouzrokovana smrt člana porodice, učinitelj će se kazniti kaznom zatvora od dvije do petnaest godina.
- (6) Ko usmrti člana i kojeg je prethodno zlostavljao, kaznit će se kaznom zatvora najmanje deset godina ili kaznom dugotrajnog zatvora.

## **Član 224**

### **Sprečavanje i neizvršavanje mjera za zaštitu maloljetnika**

- (1) Ko sprečava izvršenje odgojnih i drugih mjera suda i nadležnih organa za zaštitu maloljetnika, kaznit će se kaznom zatvora do jedne godine.
- (2) Odgovorna osoba na radu u organima ili ustanovama za zaštitu, odgoj ili radno osposobljavanje maloljetnika, koja u svomu radu očito nesavjesno postupa, pa zbog toga bude teško ugroženo zdravlje ili razvoj maloljetnika, kaznit će se kaznom zatvora od tri mjeseca do tri godine.

## **Član 231**

### **Nedozvoljeno presađivanje dijelova ljudskog tijela**

- (1) Ko medicinski neopravdano uzme radi presađivanja dio ljudskog tijela s pristankom živog davaoca ili ko medicinski neopravdano presadi dio ljudskog tijela s pristankom primaoca, kaznit će se novčanom kaznom ili kaznom zatvora do tri godine.



(2) Kaznom iz stava 1. ovog člana kaznit će se ko medicinski opravdano uzme, radi presađivanja, dio ljudskog tijela bez pristanka živog davaoca, ili ko medicinski opravdano presadi dio ljudskog tijela bez pristanka primaoca.

(3) Ko medicinski neopravdano uzme, radi presađivanja, dio ljudskog tijela bez pristanka živog davaoca ili ko medicinski neopravdano presadi dio ljudskog tijela bez pristanka primaoca, kaznit će se kaznom zatvora od šest mjeseci do pet godina.

(4) Ko, radi presađivanja, uzme dio tijela umrle osobe prije nego što je smrt na propisani način utvrđena, kaznit će se kaznom zatvora od tri mjeseca do tri godine.

(5) Ko, radi presađivanja, uzme dio tijela umrle osobe iako zna da se ta osoba za života tome izričito pisano protivila, ili ko uzme radi presađivanja dio tijela umrle maloljetne ili duševno bolesne osobe, bez izričitog pisanog pristanka njenog zakonskog zastupnika, kaznit će se novčanom kaznom ili kaznom zatvora do jedne godine.

(6) Ko, za nagradu ili radi zarade, da dio svog tijela ili dio tijela druge žive ili umrle osobe, radi presađivanja, ili u tome posreduje, kaznit će se novčanom kaznom ili kaznom zatvora do dvije godine.

(7) Doktor medicine koji učini krivično djelo iz st. 1., 2. i 4. ovog člana, kaznit će se kaznom zatvora od šest mjeseci do pet godina, a doktor medicine koji učini krivično djelo iz stava 3. ovog člana, kaznit će se kaznom zatvora najmanje tri godine.

## **Član 237**

### **Služenje alkoholnih pića mlađim maloljetnicima**

Ko u ugostiteljskom objektu ili drugom objektu u kojem se prodaju alkoholna pića posluži maloljetnika koji nije navršio šesnaest godina života žestokim alkoholnim pićem ili ga posluži drugim alkoholnim pićem u količinama koje mogu izazvati pijanstvo maloljetnika, kaznit će se novčanom kaznom ili kaznom zatvora do šest mjeseci.

## **Član 239**

### **Posjedovanje i omogućavanje uživanja opojnih droga**

(1) Ko navodi drugog na uživanje opojne droge ili mu daje opojnu drogu da je uživa on ili druga osoba ili stavi na raspolaganje prostorije radi uživanja opojne droge ili na drugi način drugom omogućuje uživanje opojne droge, kaznit će se kaznom zatvora od tri mjeseca do pet godina.

(2) Ko krivično djelo iz stava 1. ovog člana učini prema djetetu, maloljetniku ili prema više osoba, ili ako su prouzrokovane naročito teške posljedice, kaznit će se kaznom zatvora od jedne do deset godina.

(3) Ko neovlašteno posjeduje opojnu drogu, kaznit će se kaznom zatvora do jedne godine.

(4) Opojne droge oduzet će se.

### **Član 345**

#### **Neprijavljivanje krivičnog djela ili učinitelja**

(1) Ko zna za učinitelja krivičnog djela za koje se može izreći kazna dugotrajnog zatvora, ili ko samo zna da je takvo djelo učinjeno, pa to ne prijavi, iako od takve prijave ovisi blagovremeno otkrivanje učinitelja ili krivičnog djela, kaznit će se novčanom kaznom ili kaznom zatvora do tri godine.

(2) Kaznom iz stava 1. ovog člana kaznit će se službena ili odgovorna osoba koja ne prijavi krivično djelo za koje je saznala u vršenju svoje dužnosti, ako se za to krivično djelo može izreći kazna zatvora pet godina zatvora ili teža kazna.

(3) Za krivično djelo iz st. 1. i 2. ovog člana neće se kazniti osoba kojoj je učinitelj bračni drug, osoba koja s njim živi u izvanbračnoj zajednici, krvni srodnik u ravnoj liniji, brat ili sestra, usvojitelj ili usvojenik i njihov bračni drug ili osoba s kojom žive u izvanbračnoj zajednici, ili koja je branitelj, ljekar ili vjerski ispovjednik učinitelja.

(4) Za krivična djela iz st. 1. i 2. ovog člana kaznit će se i doktor medicine, doktor stomatologije, babica ili zdravstveni djelatnik, psiholog, javni bilježnik i djelatnik socijalne zaštite, ako je krivično djelo učinjeno prema djetetu ili maloljetniku.

KONTROLNA IZJAVA O PROVEDENOJ PROCJENI UTJECAJA PROPISA

Kontrolna izjava o provedenoj procjeni utjecaja propisa		
Naziv prednacrt/nacrta zakona	Prednacrt zakona o izmjenama i dopunama Kaznenog zakona Federacije Bosne i Hercegovine	
Datum	18.03.2022. godine	
Kontrolno područje	DA	Obrazloženje Ureda
<b>AKTIVNOST</b>		
Naziv prednacrt/nacrta zakona je naveden i razumljiv	DA	
Naveden je naziv i kontakti obrađivača	DA	
Naveden je datum	DA	
<b>DEFINIRANJE PROBLEMA</b>		
Problem je jasno i sažeto objašnjen	DA	
Ciljevi su jasno i sažeto objašnjeni	DA	
Očekivani rezultati su jasno i sažeto objašnjeni	DA	
<b>KONZULTACIJE</b>		
Zainteresirane strane su jasno definirane	DA	
Proces konzultacija je jasno i sažeto objašnjen	DA	
<b>PREDLOŽENA RJEŠENJA</b>		
Predložena su normativna i nenormativna rješenja	DA	
Definirani su rizici predloženog rješenja	DA	
Definiran je utjecaj rješenja na proračun	DA	
Definiran je utjecaj rješenja na gospodarstvo, društvo, okoliš, te održivi razvoj i zdravlje ljudi	DA	
Definiran je način primjene i usuglašenost s ostalim propisima	DA	
Definirano je prijelazno razdoblje	DA	
PROCJENA PROVEDENA SUKLADNO UREDBI	DA	





URED VLADE FBiH ZA ZAKONODAVSTVO I USKLADENOST  
 SA PROPISIMA EUROPSKE UNIJE  
 Željko Siladi, direktor

OVLAŠTENA OSOBA  
*Andrea H.*

**IZJAVA O USKLADENOSTI**

<b>1. Podaci o obrađivaču propisa</b>		
	Naziv federalnog organa uprave, odnosno federalne upravne organizacije	Federalno ministarstvo pravde
	Naziv organizacione jedinice	Sektor pravosuđa
<b>2. Naziv propisa</b>		
Prednacrt zakona o izmjenama i dopunama Kaznenog zakona Federacije Bosne i Hercegovine		
Preliminary Draft Law on Amendments to the Criminal Code of the Federation of Bosnia and Herzegovina		
<b>3. Usklađenost propisa s odredbama Sporazuma o stabilizaciji i pridruživanju</b>		
3.1.	Odredba Sporazuma	Glava VII, Pravda, sloboda i sigurnost, članak 78. - jačanje institucija i vladavine prava.
3.2.	Ocjena ispunjenosti iz navedene odredbe Sporazuma	Ispunjava u potpunosti
3.3.	Razlozi za djelimično ispunjavanje odnosno neispunjavanje obaveze iz navedene odredbe Sporazuma i rok u kojem je predviđeno postizanje potpune usklađenosti	/
<b>4. Veza propisa sa Programom integrisanja (PI)</b>		
4.1.	PI za period	/
4.2.	Poglavlje, potpoglavlje	/
4.3.	Rok za donošenje propisa	/
4.4.	Napomena	/
<b>5. Usklađenost propisa s pravnom tečevinom EU</b>		
5.1.	Primarni izvori prava EU	/
5.2.	Sekundarni izvori prava EU	/
5.3.	Stepen usklađenosti sa sekundarnim izvorima prava	/
5.4.	Razlozi za djelimičnu usklađenost ili neusklađenost	/
5.5.	Rok za potpuno usklađivanje	/
5.6.	Ostali izvori prava EU	Konvencija Vijeća Europe o sprječavanju i borbi protiv nasilja nad ženama i nasilja u obitelji – potpuno usklađeno Council of Europe Convention on Preventing and Combating Violence against Women and Domestic Violence – fully compliant Konvencija Vijeća Europe o zaštiti djece od seksualnog iskorištavanja i seksualnog zlostavljanja – potpuno usklađeno Council of Europe Convention on the Protection of Children against Sexual Exploitation and Sexual Abuse – fully compliant
<b>6. Ukoliko ne postoje odgovarajući propisi EU sa kojima je potrebno izvršiti usklađivanje potrebno je to konstatovati</b>		
/		
<b>7. Da li je osiguran prevod pravnih izvora na službene jezike u upotrebi u Federaciji Bosne i Hercegovine</b>		
Da		

			
8. Da li je propis preveden na engleski jezik?		Ne	
<i>Mato Jozic, ministar</i>  <b>Potpis</b>		Zeljko Siliadi, direktor Ureda Vlade Federacije Bosne i Hercegovine za zakonodavstvo i uskladenost s propisima Evropske unije 	
Datum i pečat: 16.03.2022. godine		Datum i pečat:	
		18-03-2022	

